


啟雋類函

近

二十八之三



漢書門			
四	八	〇	類
冊	架	函	號

內閣文庫			
三	二	〇	漢
冊	冊	函	書

內閣文庫			
番號	漢	11400	
冊數	48 (19)		
函號	364	52	




A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak





啓雋近體卷二十八

類函四十

東吳俞安期羨長彙編

上饒王嗣經曰常同輯

海鹽劉世教少彝訂定

天官部三


賀侍郎陞任

代賀吏部周侍郎啓

宋周必大

寵頒帝制擢貳天官日趨龍尾之階名列鷄翹之從
老成登用輿議歡傳伏惟某官篤學自天雄文追古
三十年之外補不忘存魏之心一萬里以遐征嘗歷
渡瀘之險既踐揚之滋久宜望實之交孚比自外臺

卷二十八



入儀銓省詞章議論蔚爲西漢之儒宗耆舊風流猶
是貞元之朝士萬乘首嗟其見晚諸生成快于覩先
曾芳歲之未周果荷橐之申錫人惟求舊姑小試於
吏銓道之將行即峻參於揆路某傾風久矣聞問欣
然屬司宮鑰之嚴莫展賓閣之慶祇深頌詠罔旣敷

代賀吏部葉侍郎啓

宋周必大

疏恩禁幄正位從班綜叙群才方賴崔毛之德裁成
大典更資遷固之文簪橐得賢縉紳交慶恭惟某官
德能輔世道可覺民忠精早簡於聖神政術屢經於
事任自登烏府頻發獸樽虎嘯谷而風生姦萌盡折
玉在山而木潤善類咸依因酬彈劾之勞越進論思
之地典司銓部誤次信書少常伯之清塗旣列六曹
之長太史公之重任又爲二府之儲某宿賴芘休逃
聞進擢屬總和門之賦阻陪大厦之賓欣慰于中敷
陳奚究

賀俞侍郎啓

宋李廷忠

卽家召拜進位論思小宰次太宰之班冠於紫橐內
史兼外史之職本是青瓊寵數疊頒輿情胥穆恭惟
某官文博而約氣直以和蚤負裒然之聲名著爲富
有之事業仰昌黎之北斗學者所宗起安石於東山

蒼生何幸雖孤芳忌于皎潔而大明難以蔽欺合儀
禁庭均福寰海關公門桃李之逕悉入品題撫掖垣
梧竹之陰重來潤色游揚共二之命載哀襲六之書
直筆固存清銜是稱且獻納何拘於日月蓋依乘已
迫於風雲嗣有哀恩進參坐論其心傾燕履身墮鸚
洲公遄歸袞衣今采增抃躍我方外司馬也正賴挈
提

代賀劉少宰啓召起

宋張綱

伏審拜恩天陞進位台躔凡在陶鎔舉深抃蹈竊以
國家安治何啻百年宰相稱呼蓋嘗屢易置平章於
後省冠僕射於南宮猶襲唐餘未皇周制王上親紆
宸翰追述先猷作新貳宰之名永著一王之法自非
智足以斷國論仁足以遂物宜則何以上副勞求進
膺大用恭惟某官才推人傑學造天民言不外於聖
人故常舍殺喻必根於經術豈肯借秦登二府者曾
未數年裨萬乘者蓋非一事逮茲爰立實副且瞻所
謂蕭也規而曹也隨周公左而召公右年登可待刑
措為期方此接閑聞之起立阻遠潭潭之府莫趨兩
兩之階欣躍之誠實倍倫等

賀吏部曾侍郎啓

宋趙螺江

既寵法宮陞班禁路方遊綸省直廬寓太微之西旋
領銓曹持橐為文昌之貳郵音至止輿誦藹如恭惟
某官筆補乾坤明揭日月詞采絢爛殆賈誼相如之
復生奏篇坦明於仲舒孫弘乎何有頃留冊府增重
廷紳鷺振振而于飛共欣布列風縹縹而高邁寧自
乞州迨洗日於咸池再披雲於閭闔柱史瑣闈之偃
薄詞垣帝學之徘徊至貳禮卿已久法從其進也漸
若水因地而徐行所守益堅如玉在火而不燼茲拜
九重之出綽式參四選之持衡精鑿清通所宜膺金
鏡之賜公望齎積當亟歸玉鉉之司其迹滯乘軺情
深賀屢緬想飛綏鳴玉之客莫厠後塵顧無諧韶沮
石之辭空馳慶牘

賀徐吏部兼修史啓

宋趙螺江

疏寵大庭陞華小宰銓曹四選政資木鏡之清明史
筆三長有輝金軸之絢爛擢任甚重觀聽交欣恭惟
某官本洙泗之源續伊洛之派公忠許國流水萬折
而必東鯁挺持身精金百鍊而不變頃行所學獨立
於朝憲府擊姦豈容共鯨小人之塞諫垣論事無非
堯舜斯道之陳方觀砥柱之不移忽有米山之爭倚
星羅北闕殆難會弁以群居塵起西風惟有拂衣而

徑去解瑟比更於聖化賜環始列于卿聯凜正論之
堅持恍舊觀之復覩職高選妙持衡茲貳於天官與
鉅事嚴鏤玉謹書於帝系不但云紫橐之榮耀蓋將
爲黃髮之尊崇然元祐諸老之偕來所期共治雖正
元名士之尚在蓋亦無多想深九重之思亟膺兩地
之拜某歡聞出綽猥滯乘輶雲近龍門莫厠三千之
賓賀風翔雁羽聊宣萬一之心馳慶并架深敷陳罔極

賀吏部陳侍郎啓

摘錄發端議論

宋陸務觀

恭審顯膺帝睠進貳天官成命甫行群情交慶若用
人每皆如此則公論寧復間然竊以自昔撫運而有

邦孰不好賢而願治然賢能之進常齟齬而不合治
安之會亦稀闕而難遭京房事漢則見謂小忠孔子
去魯則自以微罪有志之士太息於斯方今 主上
嗣無疆之慶基恢有爲之遠略思求人傑俾代天工
當饋歎無蕭曹共傳斯訓耻君不及堯舜今得其人
采四海之公言宜六卿之首選將斯共政以責奮庸

賀鍾侍郎啓

除吏部兼中書及侍講

宋李 劉

大君渙號小宰升賢三銓審官九重左曹之衡尺一
佛出世仍兼右掖之絲綸碧落彌高紫微增煥恭惟
某官目營四海胸著千秋關百世於寸心不夷不惠

而願孔子之學掃千軍於獨筆非韓非孟而成歐陽
之文雲雷十載之經綸江漢六年之方沍怒鵬既擊
凡馬皆空脫骨地仙直上蓬萊瀛洲之島影纓天策
徧儀承明金馬之庭堯釀舜醺最宜為誥班香宋艷
安敢比材非道不陳於前在庭無出其右日獻月納
亦有嘉謀年除歲遷士無異論四輔既備命史佚以
記言五禮有庸咨伯夷而降典露門重席星戶鳴珂
緝熙有賴於仔肩左右宜咨於汝翼掌六典之貳更
追裴馬之蹤遂萬物之宜即接夔龍之武某夙蒙推
挽竟自顛墜今墮孤雲落照之邊誰復高山流水之
賞江梅尚難於寄驛海棕詎易以移栽然蓬婆雪邊
下暑碎杜陵之葛在玉堂天上一寒望范叔之袍

賀吏部洪侍郎啓

宋人

輟從西掖進貳中臺策舊勞於翰墨之林試游刃於
銓衡之地班聯愈峻寵數加隆恭惟某官道覺民先
學窺聖秘詞章峻潔如東流赴海以莫磯問譽光輝
若北斗麗天而可仰久儀麟省旋侍螭階自入贊於
命書即兼承於密旨帝王之制坦然明白豈惟四海
之流傳道德之威成乎安疆抑亦九重之倚信蒼言
先正嘗著殊勲身雖不踐於台躔慶實有開於賢嗣

已回旋於法從卽參預於樞機茲惟天理之當然矧復人心之咸屬某繫官江上注目日邊開賢哲之得時與士民而胥慶其為欣頌罔究敷陳

賀許侍郎啓

宋程頤

顯膺綸綍進貳機衡夷夏交欣朝野響動竊以東臺地峻左省班清造膝嘉謀預聞乎大政沃心盛業密贊於宏圖是為喉舌之司允謂股肱之任選用之重古今所同恭惟某官道應直方器周遠大出偶重熙之運卓為名世之賢出入三朝始終一節屬聖心之圖舊由江滢以召歸盤旋蹈難進之風靜退保謙終

之吉千帆競過尚艤濟川之舟三年不飛曷測垂天之翼恪司真館均佚私庭雖久蔚於師言實陰儲於帝眷碩膚能遜周公之赤鳥方安舊物何求王氏之青氈復得邱音騰示輿議交歸諒於轉漏之間已有折衝之勢昔魯邦紆難由季子之來歸唐室中興自晉公之再入得人之要其利不貲洪惟本朝臻此盛事方將坐而論道方陳紹進之謨庶幾作成先王復見熙豐之治某尸官有守望履無階賀厦之禽捲華櫬而歛翼戀軒之馬俟歸路以長嘶

賀曾侍郎啓

宋戴翼

榮拜制綸真除從橐紫薇兼直煥號令於風雷白鶴
分聯增潤輝於星海得賢爲慶稽古有榮竊以銓曹
爲天下之權衡卿貳九朝中之綱轄矧東儲親密古
號三公同班而西掖清華時謂一佛出世能兼是職
亦幾何人某官山斗英標圭璋粹望非但文學人物
當今之第一抑將勲猷事業爲世之少雙自發冲天
驚人之聲名已著謀王斷國之方略記言螭陛諭德
虎闈隨所踐別爲之焜耀宜益隆於殊眷亟鼎拜於
峻除斗中之貴爲文昌已亞尚書之座魁下之星曰
台宿佇班宰相之聯泉父沐眷知越深忻喜恨縻下
邑阻拜後塵依比鵲枝末路效戀軒之馬馳緘燕復
後時慚失旦之鷄

賀蔡侍郎兼侍讀啓

宋洪适

疇績典銓升班進讀視玉堂之草遠迫三盤五誥之
遺說金華之書盡洗諸子百家之陋天將大任道不
虛行恭惟某官學包九流聲滿六合氣剛大則當今
之孟子文雅健則後代之子長功名聽其自來榮貴
付之素定不肯疾趨於半武慨知傲倪於群飛幾年
遠龍尾之階一日上黿頭之禁春翻紅藥夜對金蓮
方王言獨鼓於風雷而人物更精於水鑑欲重此扉

之值仍陪西學之遊堯舜汲汲仲尼皇皇所貴為王者之事虞夏渾渾商周灑灑直期續聖人之傳於從容暇豫之時有諮訪討論之益疑旒采簡重席逾多若昔邢昺在咸平之間與吾坡仙處元祐之始皆華蓋有翰林之選而細氈為廣廈之居不圖今焉復見作者地禁度花磚之日天低垂華袞之雲亶為六籍之光庸振諸儒之氣寵唐臣於三侍咸知稽古之榮取漢相於一言佇究經邦之業其系心玉峙決背氷銜雖怜點鐵之難成不覺彈冠而自喜結柳而送窮鬼又驚歲律之推移折梅而寄故人正待春風之披拂

賀章侍郎兼侍御啓

宋楊萬里

出綉楓宸專席柏寺御史五院風憲獨倚以提綱太微四星景緯亦為之動色一臺肅若群聽聳然某官文章兩京學術六藝蘊蓄至富殆泰山喬嶽之所藏議論不窮真長江大河之無極自宦途之鴻漸旅朝路之鵬騫學省樞庭之徜徉冊府道山之容與衆後九遷而未快自乞一麾而遽行王尊之乍佞乍賢何有於我子文之無喜無愠一聽之天公論以久而自明德望因退而愈重再趨黃闕榮陟丹聯黃麻似經

爭傳內外制之溫潤清鑒如鏡莫欺左右銓之精明
茲錫寵光首居冢列慨念解瑟更張之始尚懷置器
安危之憂雖諸老登朝咸喜盈庭之鸞鳳然群枉側
目正須搏物之鷹鷂要須獲君子而排小人自足尊
中國而折夷狄載觀近轍例爲二三執政之階卽正
宰衡光輔五百興王之運某誤恩分節式喜遠郊故
武光隨夢不到鴛行之末私棕踴躍書聊宣燕賀之
誠

賀方少宰啓

明錢士完

南宮䟽渥左揆升華承恩賜之環此身本爲天下重
秉甄收之鑑其權常與宰相均赫爾具瞻佇茲大拜
恭惟閣下天畀仙材家傳與學據數重坐席之上首
以經橫參萬乘屬車之間久於法從知荷橐論思之
尚在宜藻旒眷注之彌深雖廟謨未正於上台而政
本全歸於亞宰闢公門桃李之徑悉入品題撫禁林
梧竹之陰重來潤色必將敷宣大化以培國元氣采
聽清議以銷人倖心俾賢愚無同滯之憂斯朝野有
咸和之慶其器非適用分合歸耕顧託共里之榮異

附趨風之末元禮高門在望竟阻鱗攀孫弘東閣方
新敢忘燕賀搖旌所嚮涉筆難宣

賀馮琢菴少宰啓

明萬世德

再陟貳卿晉兼兩制天官六曹之首掌人物之權衡
神仙絕席之班儲帝王之輔弼無改玉堂之近禁聿
來金鏡之高名懽動朝紳風行藩閩恭惟臺下斗山
重望雲漢脩名早登著作之庭學宗百聖衆屬論思
之地化本真儒爰自懸車詔還衡宰吏部六十屬之
統銓佐得人瀛洲十八士之榮文華獨步其輪困舊
契樗朽散材方從東國之遐踪喜見南征之盛事聽
小人之作頌已知一時仕路之清夷觀君子之得與
竚膺九命揆階之峻絕有懷悃款不盡敷陳

賀王少宰啓

明林世吉

天曹峻秩夙稱銓鏡之司少宰清班雅重珪璋之選
蓋百弼望登乎碩德故九重特簡乎醇儒慶洽粉榆
光生簪笏恭惟明公星緯元精山川正氣鳳鸞閩海
應聖作以開祥龍躍天衢協昌期而間出文章妙今
古羅星斗于胸中節槩倚雲霄峙泰恒于宇內暴憤
四凶之竊柄遂冒九死以飛章借劔尚方直禡豺狼
之魄埋輪當道猷櫻龍頷之鱗崇名高冠乎青編令

望永光乎紫府兩朝振彩百代流芳惟簡注乎宸旒
乃游膺乎綸綍南都地重方資執法于蘭臺北闕眷
隆復借持衡于画省僉謂斯文之慶式占吾道之亨
樑棟榱題寮案咸咨乎品藻而鹽梅舟楫樞機更佇
于宣麻其喜溢彈冠身羈奉節高山仰止素企類于
登龍荒啓肅將先効忱于賀燕伏祈電照曷任水兢

賀羅少宰啓

明王家屏

經綸大學黼藻宏猷代言追渾噩之風典禮著寅清
之望瑞如星鳳縉紳之想慕維均會際雲龍旒纒
眷知有素值祥琴之既御宜温綍之遄宣汝作鹽梅

本亟需於調鼎衆稱水鑑乃暫藉於持衡詎惟甄別
官材佐綜叙九流之任庶其收采人物爲統均四海
之資泰階將賴以登闕世道可占其清淑感賜環之
並召願正切於彈冠奈伏枕之淹時跡恐違於聽履
猥蒙音貺之逮不勝喜愧之交敬托魚檄少抒燕賀
伏希慈炤曷任懸馳

賀楊少宰啓

明劉國縉

帝賚忠良鳳詔典璣衡之重臣稱社稷龍門高日鑒
之懸一時舟楫濟川千載英雄入殼望隆山斗慶溢
冠紳恭惟其官盛世元勳先朝耆德闡關閩之絕學

吾性看水綠山青等富貴於浮雲曠襟任鳶飛魚躍
 物華霜滿豐城寶氣連牛秋水長天滕閣才情飛鷺
 風泉遠韻骨鯁孤踪漢殿符璽郎身傍玉皇香案周
 官屬車令政成汧渭雲霞丁禮樂之昌期贊一人肅
 雖郊廟頌喉舌之巨任通九有出納王言兩京名重
 三台一旦鈞樞六典賡歌喜起雖云晉貳天卿簡在
 宸衷實借顛參政本玉音特降金綬平垂大臣法小
 臣廉自今伊始正人進邪人退亘古無倫真一時魚
 水之歡允百代明良之遇念其寰中弱植柱下小臣
 街命仙都覆餗久叨鴻翼驅車洛水瞻雲莫遂鳧趨
 有心隨竹舞之班無計縮迢迢之地肅將明信惟冀
 鑒存伏願勳業彌崇地天長泰集愬廣益漫誇樂彥
 輔清通明目達聰坐陋蔡豫章方直則太平可俟合
 衆力而擎天純嘏永綏且世臣而柱國

賀王對南遷少宰啓

明王守素

位列貳卿熙世崇清華之選官聯八座天朝崇銓部
 之司惟新命日膺實輿情共戴歡騰中外慶洽邇遐
 恭惟閣下毓粹舜都登庸堯宇讀書中秘經緯動天
 聽之聰珥筆承明帝座煥綸音之藻登膺穹眷游陟
 華階協贊寅清日近文昌於北斗佐平邦典旋躋鉅

要於中樞花誥燦琅函光融赤縣槐階鳴玉佩踵接
黃扉多士彈冠群英挾纊共喜太平注相佇看碩輔
宣猷九萬里扶搖鴻鵠高飛於倚蓋千百年會遇鷓
鴒借翼於秋風凡屬旃幪均叨焜燿如其謏瓌仰荷
輝榮株守南閩慚尸素于分外濫司左轄感銘刻于
胸中况瞻泰階之六符中台正朔遙望宸極之五紀
是日聯輝快覩鶯遷肅將燕賀濫承鴻庇謹布鴛私
賀周少宰啓

明謝廷諒

星臺鴻漸明白曜於紫宸水鏡鶯遷亮天工於玄宰
九重銜紱經淮瀆榮光塞津百辟彈冠罄海隅歡聲
載路恭惟其官珠躔毓秀銑社揚暉誕命世之昌期
光華日月孕扶輿之正氣嘯傲煙霞軌跡停雲凜清
風而練節發真瑩素濯皓影以開襟趣已適於松楸
望實高於槐衮尊開北海輕交委鶴之書詔起東山
坐擁飛龍之使八閩恩浸加廷尉以揆留四瀆功高
由司空而簡在部有道之冲襟範俗價重人倫山巨
源之雅藻繩時名兼吏隱曩緣同舍薛三語以梯榮
賀亂甄流致一麾而外補餘芳襲於郎署亮節著於
朝紳雖鷗渚忘機是非雙遣而麟臺勒石中外咸推
會際淑清之辰特寄樞衡之任篤誠明允舊鎮銓曹

簡要清通畢諧僉議課平成之績百揆宜司傾正直
之風萬流具仰卽事權裁決傳之秉鈞而風議從容
多所毘贊冰壺朗潤獎恬退而息犇塵玉燭調和司
考成而旌善類邦有司直長作歲星時無滯才方亨
陽德其等猥承乏於梓里竊叨署於薇藩瞻汝穎而
式閭星光遙矚過平輿而伏軾月旦獨懸咫尺龍門
隔雲霄於萬里廻翔鳳闕荷覆霞於二天媿驕守旬
宣徒望風而雀躍敬冒申悃款遙向日以葵傾

賀楊少宰啓

少司馬
轉陞

明郭子章

天上賜環朱鳳遙翔碧海朝端鳴佩金貂丹入丹墀

惟一身係天下之安危故四海仰明公之出處日膺
新命大慰群情恭惟其官性裕經綸天鍾黼黻襟懷
羅星斗文誇一代之雄節梁倚雲霄望重四方之式
人文領袖紳笏華嵩安石起東山物情共戴温公宣
洛社輿論攸歸貳政本兵旋膺銓部其使人也必器
榘題樑棟兼收有一善乎必甄鑑空衡平並用凡沾
波及疇不光榮念其誼重通家恩推再世遙瞻政府
雅有意於近龍謹勒荒緘敬傳於過鴈聊申賀臆
蕭布俚詞伏願台祉日新殊勛益懋趣鄴侯於銀信
用膺樞軸之司覆雀相於金甌獸握鈞衡之重蓬萊

卷十八
雲生五色樛櫟日有二天

賀少宰李老師啓

明陳克仕代

秉軸持衡鼎望浹於紫閣經邦論道崇勛燿於黃扉
廟堂式仰海寓咸欽恭惟某官河清應瑞嶽降鍾靈
五色爲文手自財成周冕三台應象心將茂育堯冀
金馬碧雞展也調羹之妙手木天藜火恢乎補袞之
嘉猷世仰猶龍時稱儀鳳阿衡乎物望彌綸久注於
宸衷寅亮代天工輔弼益光乎朝宁某猥以渤溲往
承謬錄於門墻茲竊斗升允幸微靈乎覆露然遡源
推本敢忘水木殊恩而造始成終實藉陶鎔大德彛
儀慙不腆代百頓以獻芹下悃仰聞慈鑒寸誠而曝

賀吳少宰啓

明屠隆

秩峻銓曹四海望名賢之用班崇少宰九重昭碩輔
之求綸綍游頌冠裳胥慶恭惟門下天台蘊秀越海
開祥早通籍于金閨遂有聲于瑣闥精忠皎皎勵金
石以貞堅正氣稜稜挺風霜而昂拔帝心簡在輿論
推先特飛紫誥以延登喜爲蒼生而強起頃從司寇
晉貳天卿踐雲氣于蓬萊天顏日近上星辰于閭闔
風憲時瞻百僚柱笏以欽承多士彈冠而相慶凡露
芳潤俱切光榮某採蕨貧儒緯蕭末品龍門千里隔

遠無地以趨蹌鳳閣五雲多幸有天而怙冒茲值鸞
遷之吉肅將燕賀之忱伏願玉海遙登金甌早覆驪
黃牝壯資藻鑑于彤霄密勿樞機和鹽梅于紫府

賀趙激陽轉北少宰啓

明謝朝佐

玉局儒僊游陟圖書之府鼇峯碩俊光聯劔履之班
桃李揚徽簪纓生色恭惟相公閣下三台炳耀五岳
儲精經世文章繡紉山龍之袞立朝丰采瑞鳴岐鳳
之姿頃秉鑑於南曹群推大雅肆承恩於內召秩晉
銓卿天際雲光地迥中朝之秘省斗邊灝氣雲流十
部之除書想蓮炬輝煌寵溢橫經之數而楓宸簡注

方需調鼎之猷某分屬門墻感深陶鑄開九重之新
命覘泰道以滋亨顧萬里之孤踪望台階而峻隔側
矚下邑愧假翼於雙鳧翹首長安敢托辭於二鯉恭
申輶賀式布縷私伏願泥詔早頒拜相真賢於夢卜
沙堤新築持衡特上於星辰

賀陳肅菴吏侍啓

明唐文燦

詞林望重銓卿已屬于鴻儒講幄班高法從仍推夫
少宰華要之階竝陟清嚴之地特居斗北騰輝閩南
競彩某系聯仙里夙蒙聆聒之恩私宦列椽曹尤藉
生成之福庇謹選伴以投尺素聊呈贊而引寸忱瞻

秉鑑于山公品題最確佇持衡于陸相經濟彌弘

少宰華要之制並起青蘋之賦

詩林望重益嘖口屬于燕

賀刺蕭蘇吏科

必與殊榮林衡卦上啟星

申辭實左亦懸殊外臨武臨早

報于邑則則翼公雙良歐首身

命點表章以滋養爾萬里之

文需臨鼎之猶其公

賀侍郎子登科

賀趙少宰啓 子登科

明于慎行

恭惟臺下斗山碩望柱石元勛總領西臺會風雲而

扈聖保釐東夏莫海嶽以歸仁忠簡在於帝心德靈

承乎昊貺茲喜黃扉渙寵廻斗柄於文昌更聞玉樹

傳芳發秋香於桂花仙臺八座已看大家宰之聯班

春斂五雲行見新郎君之步武勛高麟畫方弘稷契

之謨慶衍龍圖遠過韋平之業某幸以菲陋謬荷陶

甄喜大厦之幃幪徒深燕賀望衮衣之信宿莫遂鳧

趨敢蕭蕪緘聊申下悃

賀侍郎元旦

賀孫少宰啓

元旦

明周仲士

夏正建寅欣覩三陽交泰堯年起丙寔逢五福照臨
惟茲密勿耆儒坐膺履端殊祉恭惟閣下明齊兩曜
道裕三才南宮射策誰先首彤庭而對策北斗望隆
無右秉玉燭以調和素洽彈冠即看升鼎用迎泰亨
之治益扶乾健之精其一違鈞範倏易歲華三晉地
遙阻效椒觴之祝九重天近輒輸竹簡之忱

賀王少宰啓

元旦

明支大綸

叶曆萬年七觀青陽出震亮天三業再瞻紫氣回寅

開泰初辰履端肇慶恭惟閣下提衡元氣橐籥太和
網紀百僚高朗玉龍之燭鈞銓九品協和儀鳳之音
寵眷自天祥符獻歲新年新景荷真宰之宅工勝日
勝時諗上台之戩穀其望風遙祝對日思傾頃銜命
于西江不忘回首遙瞻輝于北斗尤切傾心敢輸葵
藿之忱敬上梅羹之祝

上侍郎

上吏部侍郎帝京篇啓

唐駱賓王

楚鞏丹質在荆南以懷慙遼豕白頭望河東而載恧
某散材易朽蟠木難容雖少好讀書無謝高鳳而老
不曉事有類揚雄徒以易象六爻幽贊通平政本詩
人五際比興存乎國風故禮物成章必寓情於小雅
登高能賦豈圖榮於大夫蓋欲樂道遺榮從心所好
非敢希聲刻鵠竊譽彫蟲至若資醜行以自媒銜庸
音而苟進固立身之殊路行已之外篇矣君侯蘊明
略以佐時虛靈臺以照物觀梁父之曲識卧龍於孔

明聽康衢之歌得飲牛於甯戚是用異人翹首俊乂
歸誠獨此疵賤之姿謬奉清通之盼雖仲由之瑟終
闕響於丘門而宋玉之謠儻均音於郢路敢忘下里
輕用上呈庶道叶起予陳卜商之四始恐吾幾失子
効然明於一言拜首增慙憂心如醉

上吏部裴侍郎啓

唐王勃

某啓猥承衡鏡驟照皆墀本慙刀筆之工虛荷彫蟲
之睠殊恩屢及嚴命頻加責光輝於昏冥課宮商於
寂寞進退惟谷憂喜聚門誠恐下官冒輕進之譏使
君侯招過聽之議貴賤交失恩愛兩虧所以戰懼盈

旬遲迴改朔懷鄭璞而增愧捧燕珉而自耻某性惟
情昧識謝沈冥蒙父兄訓導之恩藉朋友琢磨之義
好學近乎智力行近乎仁知忠孝爲九德之源故造
次必於是顛沛必於是審名利爲五常之賊雖未之
逮也亦有其志焉孔子曰言及之而不言謂之隱今
者接君侯者三矣承招延者再矣抑亦可以言乎夫
文章之道自古稱難聖人以開物成務君子以立言
見志遺雅背訓孟子不爲勸百諷一楊雄所耻苟非
可以甄明大義矯正末流俗化資以興衰家國由其
輕重古人未嘗留心也自微言旣絕斯文不振屈宋

導澆源於前枚馬張潘風於後談人主者以宮室苑囿為雄叙名流者以沈酗驕奢為達故魏文用之而中國衰宋武貴之而江東亂雖沈謝爭奮適足兆齊梁之危徐庾並馳不能定周陳之禍於是識其道者卷舌而不言明其弊者拂衣而徑逝潛夫冒言之論作之而有逆於時姬公孔氏之教存之而不行於代天下之文壞矣國家應千載之期恢百王之業天地靜默陰陽順序方欲激揚正道大庇生人黜非聖之書除不稽之論牧童頓顙思進皇謀樵夫拭目願談王道崇大厦者非一木之計匡弊俗者非一日之衛

翠持則力盡真長則偽銷自然之數也君侯受朝廷之寄掌鎔範之權至於舞詠澆淳好尚邪正宜深以為者也伏見銓擢之次每以詩賦為先誠恐君侯器人於翰墨之間求材於簡牘之際果未足以採取英秀斟酌高賢者也徒使駿骨長朽真龍不降銜才飾智者奔馳於末流懷真蘊璞者栖遲於下列易不云乎言行君子之所以動天地失之毫釐差以千里書不云乎弊化奢麗萬世同流餘風未殄公其念哉嗟呼蓋有識天人之幽致明國家之大體辯焉而不窮酌焉而不竭抱膝無悶盱衡自得彼悠悠之技焉足

爲君侯道矣自非奉閑宴接清談未可一二言也然
竊不自揆嘗著文矣非敢自媒聊以恭命謹錄古君
臣讚十篇并序雖不足塵高識之門亦可以見小人
之志也伏願暫停左右少察胸襟觀述作之所存知
用心之有地

上蔣侍郎啓 獻詩

唐温庭筠

某聞朔禽遠雪海鳥知風荀曰含靈咸思擇地况乎
謬窺墳索常稟盤盂從師於洙泗之間擢跡於湘江
之表能不成周問道先詣伯陽故絳侍言唯從叔向
伏惟侍郎稟生成之秀窮先哲之姿言成訓謨信比

暄燠某率茲孤植勸彼單詩侍擊缶之凡音嗣操琴
之舊事於是持槌自警割席相徵味謝氏之膏腴弄
顏生之組繡勞神焦慮消日忘年雖天分不多尚慙
於風雅而人功斯極劣近於謳歌頃常撰刺門人投
書齊帥蒙垂盼飾致在褒稱旣而文囿求知神州就
選遂得生芻表意腐筭生姿求言棲託之懷不在翺
飛之後今者商飈已扇高壤蕭衰楚貢將來津塗悵
望高堂有念末路增悲願持欵啓之心先偵生成之
旋倘或洛陽仲高猶記姓名建業張達方弘採拾則
百靈斯畢一顧爲榮謹以新詩若干首上獻延露蚩

聲皇華下調有慙狂瞽不稱仁私

上馬少宰啓

備體

明唐順之

白門一別驚廿稔之條新華札幾緘見兩心之如故
頃因人望晉貳冢卿以疇昔道誼之知敢效王陽登
而貢禹喜以今日政府之隔自以司馬進而安世踈
是以燕賀雖共乎群情而魚素未通乎一字惟僕之
遇公也最故而公之知僕也特深睢睢踽踽不近人
情傴僂僂僂豈堪公事曾負請纓起舞之謬志今已
知非原無製錦烹鮮之長才老而更拙循牆罔措翹
首一鳴

上孫立峰少宰啓

明程子侃

潦水未盈科望滄溟而與波浪春風初布暖舒桃李
以遂生成辱在鑄陶屢修墨楮恭惟老宗師閣下簪
纓世胄忠孝名家三策對天人素志不存溫飽四隅
宣雨露丹衷抵切君民別歷久而資望隆眷顧殷而
華階陟班司揚激職總銓衡擇照乘于合浦之濱魚
目爭爲熠燿顧空群于冀州之野鴛質競其驅馳是
將由喉舌而膺腹心覆金甌而調玉燭者也某編蓬
末品窺管庸流試策南都詎意登龍有幸上書北闕
屢嗟題鴈無緣空負網羅深慙衣鉢惜在尸官江右
已蒙廉憲之憐蒙于今待罪齊東又叨冰臺之培植
後先共成覆載恩育均切師生雖期屆及瓜五載濫
叨十劄而懼深負乘三事略無一聞敢不策勵泥塗
報效高厚伏願爲國自珍順時若福燕棲廣廈凡策
名仕籍者均畀春融蟄啓洪鈞而立雪門墻者益沾
雨化

上吏部侍郎啓

明張應泰

某昔侍南雍未遂執經之願比來北闕始酬操筆之
思錫以教言已踰金玉重之腆貺更溢尋常揣分奚
堪銜恩曷報恭惟臺下三朝重望九牧具瞻論道青
宮夙有緝熙之助襄猷畫省繁惟品藻之司念人材

既荷于甄鎔卽吏治奚逃于衡鑑雖夜思蚤作猶慙
三載之無功縱日照月臨敢謂二天之有託屬當報
績輒敢敷忱适企斗輝永綏台祉

上孫少宰啓

明張應泰

搏九天而刷羽獨羨神鯤班三事而持衡實先振鷺
是並人寰之極寵尤爲聖代之清華孰擅千秋而兼
雙美恭惟某官弼原帝資生自崧高性慧俱來疑卽
前身金粟風神夙徹應知異日石麟筆非夢而成花
文繇心而粲錦三千禮樂驚傳第一仙人五百雲龍
快覩登三詰后書方校而青藜倏映賦欲宣而白鳳

紛飛是庸闢以門墻乃遂羅乎桃李金甌早覆水鏡
同推洞識群材竄數山公之啓思兼四事大宏姬旦
之忠蓋如是斯不愧科名而微公誰終安社稷以故
鹽梅之望益懸桑梓之情某么膺賤品瓌尾寒簷昔
慕龍城讀著書竊有一班之見中更夔屈念懷刺竟
踈三及之誠當吾世而不逢遺他年之共笑敢煩尺
素顛塌寸丹雖雁鳧不齒于渤溟而蛟螭疇逃于蓋
載想謙光之遍覆每三吐哺三握髮而不辭儻漸衍
之可容或一舉手一投足而何靳堯天引領禹揆盱
衡以日爲年何昔御李

上裴少宰啓 考滿

明林繼志

恭惟某官北闕倚深東山望重蓋主知之特達而物
譽之咸歸彼刷羽之流含齒之衆靡不洗濯想茲光
輝矣顧三讓而不行於四疏而未許綠野之戀終不
可常丹衷之求必不容已行溥寰區之雨露肯遺豐
沛之辰星其晚夢三刀遲留六詔數竒由德薄三不
稱於素心途狹以格輕隻何期乎青眼茲因瓜報爰
布菲忱知日隔之為踈顧巖瞻而益切

上盛少宰啓

明周仲士

鸞掖日高東震藉羽儀之重鳳墀春暖南離看變化
之新偶逢結網不踈忽植拔茅得雋恩隆戴首喜溢
揚眉恭惟某官蘭秘芳猷淵澄玄抱黃河噴雪共驚
湧地中流華岳插雲獨聳擎天一柱聲名早騰閭苑
山斗首唱瀛洲秩進玉署鑿坡世仰鴻裁龍穎青藜
太乙詞賦重乎西京化雨成均賢後共稱北面開昭
代中天之文運錄環海八殼之英雄龍門三級其高
何啻數萬層偵神功而鼓躍鵬翻九天其大不知幾
千里伏風力以飛騰台揆虛階文章司命某戰蝸兩
角窺豹一斑媿糠粃之在前全資甄拔喜菲葑之下
體並荷栽培星辰不隔瞻依桃李盡歸啓事即看升

鼎立迓覆瓿望淑氣于雲霄覲清輝于宸座此日惟
安牛馬走尚遠函谷真人異時得附鵷鷺行並列扶
風弟子

上少常伯啓

明史鴻修

粉署凝華典銓衡而燦台星之曜丹袞懋寵載旂常
而冠卿月之班績茲揆聯千官動色命隆晉錫五老
輝騰恭惟台臺玄宇儲英清朝振采高標玉映瑩然
姑射之神人邃學金聲卓爾河汾之正脉腹笥錯七
襄之錦挾雲漢而分天章彩毫呈五色之花飲虹霓
而揮日極金閨射策雄飛振鴻漸之儀玉筍聯班清
響鳴鳳池之佩爰推高于綸省遂特晉乎銓闈秉朗
鑑于寰中盡龍虎群英悉歸品藻握神機于掌上舉
驪黃逸足咸荷甄收弘猷茂著于通明特寵聿隆乎
晉擢拂桃花之綬清卿之秩望彌崇躋列棘之班奉
常之高華日重圖陳王會輯玉瑞而協萬邦典在容
臺秉寅清而秩三禮榮增鷺序寵溢螭頭某自慚窳
陋承乏沮洳戢羽枋榆竊仰垂雲之翼分榮桃李謬
徵旭日之輝欽新渥之榮煌實私衷之忭躍肅緘燕
賀申候寵光賜上笏而行赤車願接夔龍之武履泰
階而扶日轂載看鸞鳳之翔莫罄品瞻惟祈台囑

上少宰兼學士蕭公啓

未撰
詰勅

明林世吉

螭陛綜銓藻鑑煥九天卿月鸞坡視草絲綸裁五色
 宸霞極儒臣稽古之榮侈昭代得人之盛光生六幕
 慶溢九流恭惟某官清朝珪璋人倫冠冕精儲九耀
 千齡誕名世真儒慶肇兩儀一德協明良景會鏗金
 戛玉繼秦漢之文章緯地經天闡帝王之學術德度
 藹祥雲瑞日貞操凜翠栢寒松早翮彩于鵬霄遂升
 華于鼇禁校書芸閣牙籤炫蒸火以騰輝掌制蘭臺
 紫綉浥芝泥而炫彩司持文柄則甄錄盡杞梓梗楠
 侍講經筵則獻納悉典謨訓誥詹端視篆方資傳德
 于青宮少宰疏恩兼俾論思于玉署上星辰于瓊闕
 喜近龍顏捧日月于丹青時聞天語曉荷囊而啓事
 革裾披金殿之爐香夕簪筆以亮工葱珮戛瑤擘之
 掌雪振羽儀于象魏人瞻紫府神仙鐫勳烈于鷄彝
 帝倚彤宸柱石想鈞衡高秉四銓特俾以甄陶鼎鉉
 光調三事佇咨乎燮理其集蓼苦生編蒲末學附通
 家于霄漢曾忝登龍阻修路于雲泥久稽繫鴈茲狃
 忱乎梅使敬奏記于槐樞更杼沈痛于斷葱惠徼洪
 仁于助麥倘荷芝函渙渥賁馬鬣以千秋敢不瓜誦
 銜恩矢雀環于百世

上王少宰兼學士掌院啓求撰明林世吉

聯班象闕卿雲映棣萼以騰輝掌制鑾坡墀日煥之
泥而絢彩蓋啓沃欲資乎世德故股肱特簡乎儒宗
喜榮際于一時遂駢膺乎二命恭惟其官兩儀萃秀
九曜儲精德器端凝儼爾瑤臺金鉉操持峻潔巍然
翠壁丹巖早接羽于鵬溟遂翮苞于鰲禁繡經壁府
共香泖翠簡以霏茶摘藻木天藜火映銀泓而吐燄
品夙高于輿望忠茂結乎主知謂學士為瀛島神仙
特勅玉堂而縮篆念天卿乃斗樞喉舌兼資米鑑以
亮工懸赤寫以上星辰荷紫囊而依日月日侍經筵

則歷陳讜論竑謨期致君卜二帝三王之威兩司文
柄則甄錄懸藜結綠喜侍士皆八元十哲之賢豈角
揚芬羨難兄已建牙于幾前螭頭競爽誇難弟復曳
履于文昌蜚八表之英聲樹千秋之令望黃扉調鼎
鵠佇咨燮理之鴻猷紫閣畫麒麟行勒平章之駿烈
某草土餘生甕繩賤品念先世三塵鳳掖敢云蠅附
乎通家憶京華曾御龍門敬布蟻忱于鈞座更竭藥
心之衰懇仰徽槐府之仁恩倘獲漁鸞紙于五雲永
矢效雀環于百世俯賁鴈字仰竇鴻鈞伏願繁禧駢
集穹眷維新姓名早覆於金甌元化光調乎玉燭昭

令名二十四考長和鹽梅衍嘉慶萬千百男遠綿瓜
瓞

上吳少宰啓

明屠隆

秩竣銓曹四海望名賢之用班崇少宰九重昭舊德
之求綸綽存頌冠裳胥慶恭惟閣下名高百代望重
三朝毓秀天台挺霞標而竝峙鍾祥東海濯雲辭以
彌清早通籍于金閨遂補袞于瑣闥精忠皎皎勵金
石以惟貞正氣巖巖挺歲寒而歛立當嘉靖申興之
日適分宜竊柄之辰借劔尚方寒襖豺狼之膽埋輪
當道微撓龍領之鱗雖暫忤雷霆旋回光平日月

帝心簡在輿論同推特飛紫誥以延登喜為蒼生而
強起頃從司寇擢貳天曹踐雲氣于蓬萊天顏日近
上星辰于闐闔風裁遙宣百僚歛衽以欽承多士彈
冠而相慶凡霑芳潤俱切光荣某採蕨貧儒緯蕭末
品龍門千里隔恨無地以趨瞻鳳閣五雲多幸有天
而怙冒茲際鶯遷之慶肅將燕賀之私伏願王海遙
澄金甌早覆驪黃牝牡整資藻鑑于彤霄密勿樞機
竚和鹽梅于紫府

北平魏城干梁刊

登金閣早夢飄黃巾此樓有氣溢于泚雲密以跡
而古員茲烈管憲之氣蕭條其質之味光輝王威
品請門千里爾外無此以數朝鳳閣正雲多幸自天
辰而財喪五雲共聞身似此榮其利燕食壽樂
上皇氣干聞風風蒸雲官百帝煥琳以冠承多士
德賦與公信淑賢履天曹列雲原千雲來天賦日
帝少簡古與結同封林然樂請以或登喜為言主而

啓雋近體卷二十九

類函三十一

東吳俞安期羨長彙編

上饒王嗣經曰常同輯

天官部 四

龍溪金璋友珣訂定

候侍郎

代候馮少宰座主啓

明董應舉

銓審周官弼成虞哲玉山遠照坐虛風月之談金鏡
懸旌逖想星辰之履渺茲在治迹矣負墻恭惟恩師
閣下英標泰岱聲壓蓬萊學直遡孔孟之淵源得時
則駕君欲見堯舜之事業非道不陳以金闈侍從

之臣領玉筥品流之選七司七事烈掩前聞六事六
聯忠深 上簡顧此拔茅之會不無掣肘之虞開門
撤棘雖僉信於得輿棄唾積薪亦時厪於仰屋曰贊
歲會而吏治弊於貂璫曰憲宮刑而國論乖於狴圜
非藉真儒之作用孰回 天聽於清明凡此人群總
歸玄造愧某洛誦鯁生虛庸鯉德十年仕版渺一善
之無聞萬里炎荒悵五雲而獨遠却憶三齊之驅傳
忽從五嶺以更星望馬帳於層霄載勞飛夢曠魚緘
干積歲徒欲敲冰謹藉同門附鳴積悃君恩師義何
能報一於涓埃身律官常敬矢在三於天地某不勝
顛望之至

候吏部馮侍郎啓

明許以忠

入座首推賢銓鑑勲崇於帝闕三年今滿秩旃幃恩
賴乎師門分甘下考之書敬去矣中涓之牘恭惟閣下
爲王羽翼秉國璣璇噴洙泗於毫端波瀾浩蕩宿泰
恒于襟次戶牖玲瓏蚤奪錦於鰲頭首聯班於雉尾
入趨講幄展帝師王佐之經綸出典文衡拔楚國燕
臺之茅茹華秩洊隆於彤伯崇階今竝乎山公光捧
紫泥二字公忠欽帝命榮褒金鏡一團清正表官儀
核綜允賴于仔肩左右行資于汝翼辱念門墻舊物

渥垂雨露新恩司牧備員幸托援于宛上隨班計吏
復瞻光霽于臺端正履頌德之懷復際考成之會謹
庀薄蹠而恭候更祈函文以曲成望外殊恩曲衷深
感若親闡田舍詎敢徼一命之榮第民社蕃蕪尚欲
効半臂之力言流肝鬲心凜冰淵

候徐少宰啓

明程子侃

八座簡鴻儒天下賢才歸掌握四銓膺重任日邊桃
杏望栽培敬候與居處修楮墨恭惟明公閣下江表
偉人朝端碩輔皇都得意瓊花錫禁內之春丹宸虛
懷金蓮徹御前之燭代天言而司綸綍膺 帝簡以

握銓衡可否通于輿情智巧無庸其力妍媸定于藻
鑑賢愚貪忘其身行看位陟三公龍虎榜中稱最盛
早上身端百揆麒麟閣上慶先登某樗櫟庸材幸托
枌榆之末蔭駑駘下乘難追騏驥之後塵竊計作吏
數年功未成於製錦深慚折腰五斗力不憚于負山
邇因入覲天顏遂得仰瞻台座欲陳悃素恐瀆清嚴
回首迴隔雲泥齋心特叩闈寺仰祈仁答俯賜汪涵
葑菲不遺竝參苓收入藥籠朽枯猶采傍桃李移植
公門

代候盛少宰啓

明馬朴

斗山偉望參陪八座之尊衡鑑英標協佐四銓之重
選妙天官之玉佩秩清學士之水銜遐邇具瞻遭逢
獨慶恭惟閣下兩朝宿德一代宗工文章黼黻乎皇
猷道術緝熙於聖學鸞坡視草絲綸筆掞星辰鰲禁
橫經獻納身依日月有謀猷入告於后克享天心非
仁義不陳於前用光帝德禮樂教胃宮端依華蓋之
星寅清佐玉宗伯綴文昌之座時論同歸於汝翼天
工允弼乎仔肩編儀清切之司漸典銓衡之任人物
玉山之俊整表率官寮識裁金鏡之精明綜叙流品
前裴馬後盧李既貳八法而統百官接夔龍駕伊周
佇齊萬幾而調七政聲騰魏闕光重秦關某鹿虛
庸魚魚猥瑣名邦竊祿愧尺寸之何能仙里備員快
旃幪之可庇緬然感念幸甚歸依敢勒燕函用伸芹
悃台堦地邃無緣拜紱烏之尊記室堂高有意獻旂
常之頌統惟鑒納曷任榮光

候楊少宰啓

明李守俊

紫極天高峻秩獨推八座黃扉日邇崇階特佐三台
蓋百辟儀刑之地惟德可參而四銓領袖之班非人
不備恭惟某官奎躔毓秀嵩嶽降神靈從丹穴携來
黼藻凝輝五色吉自黃裳兆始鼎彝增賁千年皎乎

卷二十一
秋月冰壺貞心瑩白凜爾歲寒松柏正氣森嚴下爲
公道之所共推上格帝心之所獨鑑璇淵遙徹朗玉
燭于神機水鏡高懸炫金波于智府秉虛懷而造士
無煩啓事山濤慚儉節以風僚不藉柴車毛玠信妍
媿之既定令愚巧之僉忘自是而棟梁榱桷收爲聖
朝寅亮之司從茲而舟楫鹽梅弼成天子體元之治
某喜溢彈冠身羈抱牘作吏數年功未成于製錦折
腰五斗力不憚于負山倘鞭策之不遺潤纖鱗于鴻
浪庶勉圖之有許振短翮于高風

候沈少宰啓

即四明相公
時養親居家

明舒曰敬

北闕恩隆簡毘虛文昌之席東山望重燕息占公輔
之資情篤天經道關世運朝野之景瞻具在門牆之
企慕斯存恭惟某官鴻庥錫祉犀檢標華淵抱湛越
海之波心澄萬頃高標儷明山而峙景立千尋躡臯
武夔茂實葳蕤於天部望雲愛日有懷軫結于親闈
抗表陳情自殷令伯之誼錫帛存問獨沾漢賜之榮
江湖廊廟存心能潛能見父子君臣並軌純孝純忠
長庚映婺曜而陸離想見二人百順輔星拱辰樞而
焜耀佇登八座三台卧龍假息於南陽司馬竟相夫
中國况沉酣道德披醅玄微若冲若缺之宗解頤喻

指為谿為谷之秘印古證今遺名益章開說關斯人
夢覺遜膚彌著出處繫天下安危鄧山甬水而有緣
暫借上公絢履作礪濟川而誰賜應歸名世經綸某
薊北凡林江南下吏懷符分祿心銜父師之慈飲水
思源念動雲天之造顧救荒守局塵鞅大類於苑懸
而走魄叩闔孤悰切比于葵向伏冀親親錫類資于
父以事君老老及人超乎家而教國弓旌在睫會招
洛社之英枚卜側聞早起平陽之荐

候葉少宰啓

明董應舉

君子得輿正際茹茅之會含生吐氣矧在桑梓之間
敢微言用舒積愆恭惟閣下大授斯文之重學為王
者之師泰山北斗之聲華早收時望紫極黃樞之事
業方抗前旌然而滄海為心春風比度與人為善初
不愛於笑嘖率性而行復無心於緣飾功名才技銷
融於道術之中黑白是非渾化于休容之表躬古人
之所難膺主上之特簡品流刀尺先清仕路之塵造
化陶鈞佇贊太平之理其於願望豈獨鄉邦其至愚
且陋多病而衰覩爾出山豈有古人之志居然倚席
濫從國士之遊望海上之山川可勝延結談座中之
風月倘許樞趨敬劈魚箋上塵鴻鑒潔身受事不悉

所云

候蕭少宰啓

明鄭懷魁

奎壁星輝朗人倫之冰鑑台衡望重開當代之文明
 實簡在於帝心知歡騰乎草野榮分紳佩慶洽門墻
 恭惟老先生南斗文星中垣上弼向掄材於藝苑品
 藻公清近主計於天曹銓衡明正洵用人之惟已誠
 以道而事君此日計夢卜惟新明公正鉉台在望念
 某有第夙與及門曾吏事無能久承庇廈叨二天之
 化雨沾漑彌深望五色之祥雲瞻依依益切敬摠微悃
 用奏蕪詞惟冀鑒原可勝鏤佩

候周吏侍老師啓

慶居

明鄭懷魁

鹽梅望重弼帝日于彤闈風木悲長奉慈雲于素旆
 仰緋謳之至止謹絮酒以馳忱洪惟老師命世儒宗
 匡時元老橫經講幄躬孚納牖之忠啓事天曹獨秉
 湛壺之鑑惟大官鼎養之日正慈帷恃粥之辰移忠
 之聞日隆則在公戲彩純孝之衷天至則心動陳情
 迺楓陛之眷深遽棘人之涕墮計聞朝宁驚恒宸嚴
 帝錫神臯劔合雌雄之氣微垂彤管經尊徵在之名
 榮哀兼隆臣子罕儷某誼屬門墻之下情懸堦祀之
 間緬惟師臺鷄骨之痛崇深龍光之旋伊邇肅候興

居於禮次願言爲國而節哀

候孫少宰啓

明程世奇

鑑燭仙臺華選峻依于北斗詞輝瀛島文光直映乎
東星允爲百辟之刑自結一人之眷三台虛席以待
四海引領而瞻恭惟某官祥呈惠水靈發梁溪揮翰
丹墀首占皇州春色傳臚紫極先披閨苑香風深嚴
近龍陛光華麻官鰲禁清切跨鳳池佳麗草視鑾坡
攄忠藎于講帷究治亂興亡之故罄嘉謨于經幄辨
天人理欲之機寵覆擷袍光生蓮炬儲端左右懋官
尹之弼諧卿貳贊襄典秩宗之禮樂形端而表儀肅

源徹而藻鑑清三月春深向隅孤寒沾照育九秋月
朗固墻淹滯對清光念中邪混而國是漸搖侃侃疏
凡三奏思臺省輕而言責弗振諄諄上有萬言鴻名
雅重于銓曹芳齊盧李鳳藻仍兼乎史局駕並歐蘇
久矣廟廊推此日伊周頃之密勿佐當年堯舜適觀
喜起坐享昇平其濫厠花封負譴無裨于千室叨隣
梓里推恩雅荷于二天大寬斧鉞之誅未沉計典沃
被滄溟之潤幸與給由第失伍多于持戟之三伊誰
之咎則平陸等于爲都之五宜服其辜敢謂天地生
成常沛及時霖雨切聞風雲變化倏爲肅物嚴霜惟

俛首以聽處分敢妄意而萌僥倖

候楊少宰啓

明李國祥

日朗丁銓輕重試衡集燕水疑午制低昂欲度飛鴻
書盈閣彼多授鏡徹况茲精鑿九流服叙貳職推高
恭惟某官鳳石鍾竒龜峰吐秀幼為成器允兼裴樂
題評長有重名實並凝凌稱許紀聞柔翰問竒履滿
雄門接詣清談干澤緘深綰室桃花生綬緹朱交映
參差李樹無蹊藻鑑獨留煜雪中臺未進雖非譬斗
簪荷小宰徒居已是典銓扇羽聖主其難其慎山之
啓事遲留孤寒得達得伸汪也權書共悅門庭蕭索
頻頻紙帽風吹篋篋驅除咄咄練蒲日御喜去人中
市井驩傾都下衣冠選部即真此日無訾寡學官人
靡失爾時空詫遺才有待納言無淹熙載其暗逾沒
字縱薄後名業失青箱今級媿因餘緒廕從畫省先
卿績奏少銓溺職幾七年建監知無尺寸守官如一
日操持敢失分毫莫際停年每揣譏來刀素有逢重
闕尚祈聽絕雌黃白門幸得登龍止談風月赤牘莫
從賀燕仰藉沾濡伏願留情先後持衡書青本祖益
祈注眷從容登鼎輸赤承天

候少宰李旭山老師啓

明施德政

造化全功曾預春風之一拂塵埃武吏復依厦屋之
萬間懷感輪困受知襞積恭惟師臺忠貫日月誠塞
天淵發之廣衆大庭天日可對養之暗室屋漏衾影
不慚瑩乎冰玉爲心芬然蘭蕙爲質東山戀謝傳蒼
生引頌何殷洛社起温公丹詔臨軒再錫四難從事
成周家空園之仁五教明刑躋虞氏畫裳之治榮承
帝制簡陟天官退卯入辰精勤爲人物之衡鑑屠牛
切玉犀利擅刀劍之莫邪鶯鶴易其林梁鳳鸞超乎
枳棘行趨紫閣立耀丹青某窺管識卑挈瓶智小備
半生牛馬之走終覺驚庸在崇臺衣鉢之傳卒無象
似敢不靖共爾位惟旣厥心技效一鳴持此答曲成
之造價增三倍諒不遺卯翼之恩遠候興居敬顯官
役願金甌之特注賴及萬年佇寶鼎以均調咸有一
德

餞侍郎

餞趙少宰啓起用

明楊道賓

芝苑夙推調護播雲笙之響天台新命汰澄持衡石
 之平重看載道而南忽覩空群于北人瞻山斗階列
 星辰恭惟某官執苑宗工仕途大治太山喬岳大雅
 興起斯文舟楫鹽梅精忠受知明主初承眷命總肅
 宮端洵荷綸恩拔登少宰寵隆八座榮耀三台奉詔
 登途惟王程之事急脂車執御望高軌以輶違載酒
 道周爰唱驅駒之曲輸心祖席聿瞻鶴鷺之行注目
 惠臨祇迎都從

唐書卷一百一十九

請蕭少宰座師啓 九日

明謝肇淛

序適莫房感龍山之命駕爽生函丈瞻臯比以多違
敬涓某日之辰僭枉青雲之馭溪澗沼沚敢羞前席
以為馨沂水舞雩願陪後塵而請事仰承餘馨祇候
執綏

謝侍郎

謝王侍郎啓 得卹典

宋劉宰

劬勞之恩欲報無日瞻卹之典有來自天竝舍驚嗟
孤生感泣伏念某丁年擢第乙念榮親自失投機屢
孤推轂千鍾弗暨養志焉實難七選未離揚名乎何
有曩由吹送得冒殊私自量何有於毫分懼免亦幾
於八九端門有赦深知推錫類之仁陋巷光生其敢
援陞朝之例忽幸追榮之及靡徇執法之常恭惟某
官參八柄以詔馭臣閔一夫之不被澤謂烏猶反哺
而况於人雖鴈不能鳴當為之地乃飭所隸母牽於

卷二十九

十一

文遂使亡親例膺命秩以至糟糠之舊亦霑雨露之
新心實未安義不敢卻潔蠲以薦恍如稱壽於生前
英爽猶存諫亦感恩於地下

謝林少宰啓

薦舉

宋真德秀

月評甚下媿南州名士之稱露秦忽騰辱西清近臣
之薦伏念某自知甚審所挾太迂早歲科名似未忘
於祿仕平生志願端不在於輕肥顧嘗安窮達之天
其敢作清華之夢閉門讀書史方加涵養之功低顏
奉君侯肯事躡嚙之態縱舉世不知而何損惟鉅賢
見遇以為榮猥霑一字之褒奚翅千金之重茲蓋恭

遇某官孤忠自許直道不回柏臺彈奏之公若判白
黑荷橐論思之益如炳丹青屬紆吏二組以為州適
奉尺一書而薦士不緣造請首及羈單孔丞相恐人
之知於今復見魏獻子唯善所在顧我何堪某敢不
敬佩殊知誓堅素尚雖舉賢本於報國初非種桃李
之私然盡節所以酬恩尚益勵松筠之操

禮之龍門畏楊震之四知敢累關西清德感孫陽之
一顧詎忘冀北長鳴敬將締絡以表微直北瞻肝而
為報

謝少宰徐公啓

明吳守道

銓衡參掌仰藻鑑之精明榱桷兼收荷甄錄之榮寵
幸作狄門桃李欣同漢杜杔榆心切瞻依情深銜結
恭惟某官經綸學術黼黻菁華德器溫良儼若渾金
璞玉才鋒英發銳然干將莫邪群推命世文章蚤繫
公輔碩望看花上苑一朝會際風雲剖符名邦兩地
遍施雨露人人思召伯奕世甘棠在在立梁祠千秋

俎豆心懸寶鏡坐照庶司妍媸躬秉權衡曲盡群材
器使薦賢為國惟帝念功受簡在之具知膺超陟之
曠典行且黃麻命制咨熙載于萬機紫閣調元弼寅
亮于九德者也某竊領歲升自慚凡品適有天幸奇
邁明廷俯憐青氈冷官令傳紫陽多士俾講磨于芹
泮庶收功于桑榆迺今形無奔走業有專攻遡厥玉
成愧乏瑤報念造就等齊天地鏤骨難忘當濡拔展
謁雲巖稽首叩禱天助其順一德永孚于宸衷神福
其謙百祿是道于玉體椿萱長茂疊休綸綍之音蘭
桂向榮聯步科第之武區區上願縷縷下忱恭修簡

牘之中干冒再盼遙瞻厦屋之庇曷任仰祈

回答侍郎

代回盛少宰啓

灌關人

明馬朴

貳銓金鏡三台應北斗之尊八座琅函十部分南金
之寵偉甚天官之錫福爛然星使之遙臨儀物兼隆
感慚彌至恭惟台下三峯毓秀九曲孕靈麟史傳心
得雋蚤標平赤幟魚書錫命陞華直躡於紫庭玉署
典絲綸誰不仰瀛洲學士金門懸藻鑑渠寧誇吏部
文章偉矣秩宗贊中和而典三禮巍然少宰公黜陟
以統百官蓋將晉公孤師保之尊故輶需卿貳銓衡
之重聲喧海寓喜動笏紳某久濫朝簪謬司關鑰地

當梓里欣庇履之有緣路遠槐階悵掃門之無自乃
承渥眷先惠腆儀翰章來五色雲中捧持動色獎飾
自九重天上猶省靦顏踧踖登嘉偉遑佈謝寥寥尺
素愧蟻悃之莫宣耿七寸丹冀鴻慈之見炤

代答余少宰啓

明程世奇代

鄞水儲精濟美晉陵上第明山毓秀齊芳卽國元勳
寵沐三朝宮尹寔隆新命職兼六館儲端已屬老成
纂先朝英君誼辟之徽猷昭後世聖子神孫之明鑒
筆則筆削則削祖述麟經是曰是非曰非直追狐史
非徒垂休光于玉堂金馬行且贊鴻業于紫閣黃扉

其幸坐春風叨依化日自西來而易歲跡遠宮牆舞
北望以興思神馳山斗肅瞻台翰足徵造就之恩寡
和陽春徒抱勤渠之悃雖青氈自冷非若保釐之司
而墨綬常懸亦有教化之責精力旣疲于奔走安所
潛修神思久耗于課程焉能靜攝左圖右史漸惟架
上之塵吞苑瓊林定屬寢中之夢有虛此日大負生
平倘鞭策之不遺庶勉圖之有許卽未能奮身上國
亦免于蹶足中途茲遇便鴻敬緘雙鯉仰惟台鑒俯
慰愚衷其曷任悚惕之至

卷之二十九

紫天疏渥丹地懷香南閣升元士之班選除甚重考
曰南閣左臺計群吏之治研覈惟精賢望所儲公
言以穆恭惟某官袖有十二牛之新刃腹藏三萬軸
之故書惟杜陵人久矣名家宜平津侯延之上客徹
聞旒纒驚動紳綬出守邊城豈待三年而後召進丞
兩寺不踰朞月而再遷公自視為有餘上欲用如不
及翔於鷺序籍甚鴻名風烈有先尚書之遺今以任
郎曹而甚稱治行為諸州牧之最故於考吏課以尤

司官初擢

賀考功程郎中啓

宋李居厚

紫天疏渥丹地懷香南閣升元士之班選除甚重考
曰南閣左臺計群吏之治研覈惟精賢望所儲公
言以穆恭惟某官袖有十二牛之新刃腹藏三萬軸
之故書惟杜陵人久矣名家宜平津侯延之上客徹
聞旒纒驚動紳綬出守邊城豈待三年而後召進丞
兩寺不踰朞月而再遷公自視為有餘上欲用如不
及翔於鷺序籍甚鴻名風烈有先尚書之遺今以任
郎曹而甚稱治行為諸州牧之最故於考吏課以尤

啓集類函卷之二十九

十八

宜恐詔墨之未乾聽履聲之如舊某挺鎔鈍品灑掃
賤蹤方結戀於華軒俄傳音於疾置鶴廳考善
下下之勞燕屢慶成尚願託渠渠之庇

賀吏部趙郎中啓

宋黃景說

出緯楓宸褰裳蘭省恩章狎至旁聯列宿之光風采
聿新進典三銓之重本支擢秀輿頌交歡惟一時屬
籍之英負四代禮樂之氣植立見於議論風流播於
簡編早膺清切之除見謂通明之器凋戈錫盾聊分
畿節之榮簞第錯衡爰促介圭之覲亟紆宸眷分典
銓曹少儀粉省之班正印甘泉之從倚觀賢業高揜
前聞某託託云初修詞敢後讀元和三十七之疏猥
玷同升贊虞庭一二日之幾第觀掀舉容趨賓榻以
既賀綜

賀吏部郎啓

明馬 朴

三禮華曹懋著寅清之望四銓重地特資品藻之猷
 惟望協於疇咨斯寵膺夫帝簡縉紳鼓舞閭里熒煌
 竊嘗以時世之替隆本諸吏治而賢奸之進退繫在
 官人惟星衡不私其低昂斯羽金可別若日鑑少昏
 於好醜則朱紫靡分豈惟家卿總管九流而小選實
 參六典事煩職碎人必覓佳況至邇來尤多弊政銓
 除壅滯積薪嘆轉石之難斥逐沈淪拾艾無賜環之
 望去留懸於金鷲之隔僥倖生心是非淆於賄賂之
 章鑽營得志官毋以轉廳而忽寄座吏益以掌案而

檀專家三窟傍營千瘡橫潰故非清正有才之真品
公方匪懈之名流難以更解局茲廓清途轍茲惟某
官山濤明潔裴楷清通五載大行人久煥使星之彩
再遷小宗伯鬱騰卿月之輝顯承螭陛之寵綸驟晉
鶴廳之華貫舌含粉署馳儁譽於官眉手捧紫泥羨
英游於省眼闢茹茅之泰道畢舉群才杜桃李之私
門式光九秩誠大猷允升之會符君子道長之時凡
在交知咸思引頌矧叨姻戚能已彈冠是竭蟻誠虔
脩燕賀卑棲右輔僕自知堂下之人初進左曹公亟
答寰中之望不勝大願尚冀汪涵

賀袁吏部啓

明王 焯

桂憶仙郎粉署新詞振鷺春傳太史上林遷鶯喜溢
荆門青山競爽光生桂籍紫氣相望恭惟某官金鏐
作骨冰玉爲姿鷄林擅赤幟之奇難爲兄而難爲弟
龍子豈汚池之物俄爲雨而俄爲雲初蒞河陽一縣
之花載剡胄監六堂之秀處處穠桃艷李亭亭翠栢
蒼松閱練旣深聲名日起老成在位倚任益專宣室
受釐曾奉鬼神之對帝心簡在復司考鏡之權謂天
曹不可濫膺必明公克勝是任南宮號稱眼目冰心
可鑑鬚眉冠偉鷄鷄操鈇袞於威嚴之下香含鷄舌

寄薪爇於封事之中其分托同袍喜為不寐第愧風
塵散吏兼之拓落無奇精白一心願希蹤於鄧令品
題十倍是所望於山公

賀蓋選君啓

明李國祥

右闈升華吏事熙朝第一左曹還業英聲要秩無雙
覈才平類王丘察隱敏同鄭澣媿慚照水安幸倚山
恭惟門下玉潤冰鮮煙翔風邁舌含香于粉署膽落
照于冰壺拔異才甄殊能偏推銓叙之美斤革競塞
私謁共嘉明雅之賢久弘衡尺以題才佇晉臺階而
借畫某曲捲臃腫潦倒粗疎居近鳴珂執苑舊沾殘
賸生瞻躍馬官途仰賴吹噓媿積捫心罪開擢髮短
箋寫慶薄幣紆誠身睽賀燕之班心逐滯鴻之隊海
度寬容踈節春暉大植朽株引領無休銘肝不淺

賀劉考君啓

明李國祥

烏位高懸夜炳星文于瑤斗鶴廳弘闢日輝錦彩于
彤雲式副銓衡允資冰鏡恭惟門下高標符彩峻峙
英規彰芬藻于芳風映璘璣于卿霽窮經半豹蜚聲
翰墨之場齊轡群龍策足功名之路轉朱為墨人膽
落水壺使氣為香奏事舌含粉署平允飛才于衡尺
立臺須盡于台階由列星曹佇調天紀某單門後進

委巷輕生學木前人空守嗜書之癖饑來驅我翻為
捉賴之謀聞知舊之得輿望遊揚而結綬馮彼魚箋
之遠申茲燕賀之勤

賀朱考功啓

明

英鑒高提不著稱于銓叙文鋒奇振允起譽乎瓊章
喜溢彈冠榮期調鼎恭惟某官孕秀蒼龍鍾靈白鹿
揭長庚於曉漢屹砥柱于狂瀾初寵秩以七兵遂任
參其六典乃爾覓佳海岱居然得辨銓衡典碎鶴廳
頓起望郎之譽奏含鷄舌共稱小選之賢澄綜核于
九流參論思于四近其盟津負弩人慰藉于識荆渭

水隔雲切瞻馳於懷李在公左曹初進起雙燕入厦
之歡在某東郡久沈切一驢鳴技之望輒效錐囊自
薦敢憑蟠木先容潛用幣將敬馮箋寫

賀丁銓部啓

過家
壽親

明徐 燝

恭惟南極星高壽算照臨乎婺宿北辰日近銓曹
鑰乎天樞玉尺持衡風清水鑑板輿將母雲翦萊衣
表辭主爵之司恩給窳親之假萱花侵雪色映黃髮
以婆娑桂子噴秋香釀金莖而霽霽飛龍御極謝公
此日詔起東山神鳥銜箋王母今朝書來瑤圃九如
獻頌窳論啓事山濤百歲稱觴不數拍浮畢卓宴樂

盡人間之盛事歡娛極世外之洪庥某櫟社臚樗燕
鄉散梗猥蒙璞識屢荷玉成忝侍龍門幸執鞭而御
李薄申燕賀愧渡海之蟠桃數舍非遥慚千里升堂
之范式扁舟乘興咲半霄返棹之王猷輕輶不避于
鴻毛依附敢忘于驥尾借通魚素聊慰鶴思

賀游吏部啓

明徐 勣代

岳薦允諧銓署久虛左席宸衷獨簡秩宗懋轉中台
藻鑑當胸風霆載筆遙瞻鳳彩肅致鳧私恭惟某官
朝野鴻名巖廊偉望儲九官之宏略包羅黼黻經綸
啓二酉之秘函吞吐雲霞錦繡負玉鉉金甌之重萃

黃山白岳之靈揆路持衡任比佐時之伊尹泰階接
武班聯啓事之山公信昭代之典刑士林之正鵠也
某喆窳庸才公膺末品心懷仰止每思聞道于下風
天假良緣竊幸備員于隣壤愧識荆之偶值僅能窺
豹一斑想御李于後期更冀附繩千里魚鮮無狀實
賴旃幪計過未遑敢徼覆露伏願山川藪澤自應藏
疾而納污蘊藻蘋蘩倘許修明而薦潔身羈匏繫志
志切葵傾獻此芹忱神馳楮素

賀朱玉槎考功啓

明樊王家

江湖懷魏闕聲華夙重螺川邦國借銓衡徵辟爰勒

鳳檄肅風稜于百吏膺天眷於九重敬候興居聊修
 楮墨恭惟其官清朝一角之麟盛世九苞之鳳蚤撥
 巍科于三殿旋敷文命于四方憑軒採萬國之風謠
 賦政作一王之喉舌爰承帝簡特典官評中外鱗次
 以並登長孺絕積薪之嘆賢否條分而不亂工師適
 用木之宜蓋握斯世之黜陟殿最於掌中復置此身
 之恩怨愛讐於度外是以朝收其用而衆服其公旋
 乃望隆於時而德光於讓國以一人為輕重豈應賦
 松菊而製芟荷身關百辟之典刑正藉其蒼微而栽
 桃李且虞廷之考績明試以功匪裴儉之知人孰司
 其鑑繫公是賴惟帝曰俞聞命而士慶彈冠懷賢而
 上方側席需材急於望歲式序在位會看振鷺之充
 庭此行何異登仙以我公歸快覩飛鴻之遵渚某職
 踈藩岳望切斗山半生北郭濫竽瞻睠戴一天之覆
 此日東山應詔殷勤祝萬里之轅無地登龍有懷躍
 雀六計以弊群吏敢邀啓事于山公一顧而價千金
 竊効長鳴于伯樂爰爰東帛悃悃由東國家有正人
 聊以志喜臣子無私賀諒或鑒原

賀司官生辰

賀選君生辰啓

明史鴻修

光涵水鏡公門綸桃李之華彩映星弧壽域啓蓬萊
 之瑞介鴻庥於崇茂引鶴祉于升恒色動仙班龍增
 帝祉恭惟台臺精儲斗極異叶長庚月明南浦之珠
 預識環資不偶星動豐城之寶由來神物非凡蚤振
 藻於葩壇炳蔚訝一麟之吐秀旋蜚英于杏苑高華
 齊五鳳以騰輝載味皇華聲馳專對爰司品藻識擅
 群倫鑑朗一輪炫金波于智府衡懸萬象秉玉尺於
 靈臺贊六典以遴才而駉駉騏驎盡入空群之選綜

仙傳類函卷二十一

三筮而籲俊而犧樽牛鐸悉歸大治之中士慕荊州
咸思附鳳名高司隸共羨登龍茲者商音奏西陸金
鸞拂桂殿之清瑞氣繞南天璧月藹芝房之色霞觴
捧進誇五液從仙掌分來霓羽登歌驚瑤曲自廣寒
飛下鷺序起頌喜之味鶯祥懷生甫之欣慶溢千秋
歡騰萬國其附慚驥尾花切鴻帡祗匏繫於西墜每
旌懷於北斗恭逢瑞誕忝極遙踪自阻見趨靡由歌
赤壁鶴飛之曲庸申燕賀願少效金籠鳴放之私聽
履上星辰朋三壽而蚤應三台之瑤象探籌忘日月
膺萬祺而永毗萬曆之金甌

賀司官端午

端午比舊寅啓

明董應舉

招搖指午鷄火司權洛水寶圖忽見朱明之瑞武成
慶賜先沾侍從之臣謫王殿之歌薰列金盤而射粉
香聞篤耨氣沐芳華恭惟台下蘊道術之昭融觀陰
陽之消息肇修五政應日德以輔時齊戒一心葆天
輪而若節故能忠規結主靈鑑為神邁李泌之獻身
軼開元之吐霧石精發彩鈞調生化之功赤熒流光
假大宣平之烈表修景於中朝早為周臬造皇家之
元命陋彼朱絲其等望斗比辰叨塵南國三山二水

依然駟履之猶存四事六聯赫矣典刑之具在聊修
不腆上瀆清嚴馳戀之私非言可既

香屏言氣厥水芙蓉
夢顯出出制文
計計計于與火
計計計于與火
計計計于與火

謝于其書寅拜

明謝廷諒

賀文選兄生辰啓

明謝廷諒

西堂榮秀藻春雲育靈藹之符南極吐祥光秋水映
神條之潤濤分疋練驚白馬以添籌氣引雙玄躍青
牛而練質瑩神寥亮觴思怡愉恭惟吾兄翠蔚高標
淵冲上喜蘭泉渙飾森寶樹以氤氳秋斲習融登神
梧而頡頏升堂射策飛騰稱藻績之工隔暢傳經領
略綜名書之會魯恭逃匿讓愛弟以成名龐德棲遲
載逸妻而滅景喜謝家子弟仍有鳳凰之毛羨陳氏
父兄遂成羔鴈之族伯調管籥歌綠水而咏南陔季
展毫端望白雲而熙東旦暉翔牛斗翹占五百里內

星奔瑞啓羊城回首三十六峰霞蔚第因捧檄高會
龍沙歸擬稱觴恭承鴈序跂三山於東海未覓王母
之漿携五色于西山已吸洪崖之液

啓集類函卷三十

類函四十一

東吳俞安期羨長彙編

上饒王嗣經曰常同輯

龍溪金璋友瑀訂定

天官部四

上司官

上明員外啓

此篇未詳何部觀頌中語似當附吏部郎

唐王勃

側聞金烏聳轡俯圓燧而抽光瑤兔浮輪候方諸而
吐液斯則洪纖異數冥符造化之津高下相懸精契
陶鈞之表故知聲同義合存長幼於三州理隔氣殊

置山川於一面神交可託風雲於杵臼之間道不虛
行涇渭於簪裾之列其有跡申知已投爵里於思齊
事迫當仁抱龍泉而願割雖荆山已峻多輕抵鵠之
珍而渤澥方春敢進歸鳧之景伏惟某官珠躔降德
銑社抽英河嶽縱其神器煙霞發其符采江東第一
家傳正始之音日下無雙譽重名流之首三冬文史
先兆跡於青衿百里絃歌卽馳芳於墨綬榮加從袂
上清蘭府之遊寵奪攀輪更掌蓬山之務麟圖緝謚
定榮辱於三泉鶴閣裁書考薰猶於四部旣鶴鳴雲
路望儷朝端鴻漸星臺俯諸僉議燕平譽號李宣伯
之當官雅操繩時山巨源之稱職加以文場武庫發
揮廊廟之師瓊樹瑶林寥廓風塵之表詞條鬱霧遙
騰駕日之陰辨鏘橫霜直上衝星之氣息鍾蓄韻聞
片言而指掌鸞鏡懸心見一善而明目情源九派士
流欣滿腹之期德宇千門詞人有庇身之望某崇徽
啓緒盛德傳家承太子之仙宗析將軍之遠系遺風
舊烈尚存清白之基祖德家聲代有縱橫之自雖雄
名雅譽隨翔野而揚聲而革冕雕軒比南風而不競
趨庭洽訓共歌朱萼之篇避席承觀猶守青箱之業
嘗謂酣神北阜藉春渚而忘歸動影南櫺坐秋山而

長往不意蘭皋獨嘯輕交委鶴之書芝澗行謠坐辱
飛龍之使年殊賈誼仰宣室而方同業謝劉繇俯長
途而遂愿豈不知拂衣長謝林泉多倦俗之因安枕
有餘廟堂非養高之所而欲俛首屈膝逡巡多士之
林弟影慙魂骯髒文昌之府識正平於處士雖在孔
融期仲容於望外終資許允猶恐先馳折翮頻驚鷓
路之風再舉枯鱗空擊龍門之水若借以顏色資以
恩波垂雅契於長年叙情交於累代情加倒屣知步
項之生光禮極升堂覺聲名之有地是用俯抽丹思
上瀆清顏鏤殊獎於肝膽銜德音於咳唾懦夫增氣
先歌易水之風壯士投心思赴吳宮之火恩崇命淺
瞻呂梁而可涸山高海深涉孟門而何險

上吏部韓郎中啓

唐温庭筠

某職異旁通才無上伎幸傳丕訓免墜清芬衡軛相
逢方悲下路弦弧未審可異前朝郭翻無建業先疇
嵇紹有滎陽舊宅故人為累僅得猪肝薄伎所存殆
成鷄肋分陰屢轉尺涕難收仲宣之為客不休諸葛
之娶妻怕早居惟數畝不足棲遲智効一官靡能沾
沃荒涼散社流寓窮途高堂之饗社難充下澤之津
蹊可見竊以棄茵懷舊尚動深仁投釣言情猶牽末

契敢將幽懇來問平衡昇平相公簡翰為榮中箱未
秘頗垂敦獎未至陵夷儻蒙一語姓名試令區處分
鐵官之瑣吏厠鹽醬之常僚則亦不犯脂膏免藏練
素豈惟窮猿得木涸鮒投泉然後幽獨有歸未託山
濤之分赤蟻無耻免于程曉之門進退彷徨不知所

為舉人上韓郎中啓

獻新文

唐李商隱

某啓某少承嚴訓早學古文非聖之書未嘗關慮論
都之賦頗亦留神徒以不受綵毫未吞瑞鳥馳名江
左陸機莫及於材多擅譽鄴中王粲終聞於體弱上
下羣士差池累年頃者輒露疎蕪不思狂簡捧爝火
以干日御動已光稍抱布鼓以請雷門忽然聲寢不
謂郎中搜才路廣登客門竟望大附書冀鷄談易特
垂題目曲賜丹青旋屬榮嶠從行神州視膳同孟陽
之覲蜀比孝若之歸齊雖佩恩私竟乖陳謝光陰荏
苒誠抱勤拳今此秋期遂有大幸更奉禰衡之刺敢
無駸茂之言某在京多時自憂有疾失外郡薦名之
限俯神臯試士之期物情既集於宗師公選果歸於
令季懷材者皆云道泰抱器者自謂時來以卞和為
玉人無不收之瓊玖得蹇修為媒氏無不嫁之娉姪
是以願託一拳潜布百兩顧方流而有託慮良會之

猶賒伏惟郎中與先輩賢弟價重兩劉譽高二陸比
李膺則仙舟對棹方馬融則絳帳雙褰若某者雖陋
若左思瘦同沈約無庾信之腰腹乏崔琰之鬚眉然
至於感分識歸銜誠議報將酬楊寶則就雀求環欲
答孔愉則從龜覓印惟其異類不後他人謹復陳新
文重干清鑒馬卿室邇孔子墻高遲面莫由隳肝無
所任重道遠方懷驥坂之長鳴一日三秋空詠馬嵬
之清什知深可恃言切成煩幽谷未見於鶯喬曲沼
空勤於鳧藻仰瞻几閣伏待簡書

上吏部選司啓

求授本省教職

明邵有麟

位屬天卿甄叙崇清階之選官榮銓部精明贊啓事
之謨簡命方新興情共仰恭惟珪璋偉器鍾鼎名家
高邁丰資卓爾藍田之玉闕閔襟度汪然海瀚之波
彩筆灼三台累世文章獨步巍科紹入座歷朝勛業
孤騫初治司馬功曹威靈丕罔繼典掄林東省髦俊
兼收荷試錄之寵頒不數青箱盈軸捧賢書而朗誦
曾誇彤管宏詞乃轉封司爰持銓柄少華者蒙獎息
隨流競捷之狂譎譎者被懲舒負世獨醒之鬱倖門
絕履仕路彈冠某鉛槧庸流章縫未學兩謬叨乎乙

榜竟踟躕于公車家壁四懸椿萱入袞願振廣文之
教鐸只圖本省之盤餐計冷官無擇乎炎途念首霜
便供乎菽水匪敢仰攀桑梓而竊附葭莩惟祈加意
草茅而留情寒峻從今日榮沾一命皆台臺惠渥二
天伏願帝眷彌增穹禧益迓晉陟尊嚴之地歷膺華
要之班瞻玄鑑于山公最確品題永霑溫陵之河潤
纘中樞于可老旋弘奕理獨標閩海之家聲肅叩愚
衷希垂慈矜

上林選君啓

給由

明連繼芳

恭惟某官著蔡金閨鹽梅玉鼎備四時之元氣攬一
代之銓衡萬籟秋風借翼鸞鳩有地九天春雨爭研
桃李無偏指面顯槐方眸別藻均遊塊比盡在帡幪
其登龍受書之年附驥射策之日方幸貴人天上何
憂故友泥中守郡莫效一籌給由敢微半紙烏知擇
木肯捨空地榆枋燕賀屢成更傍誰家門戶端馳下
走冒達中涓伏願下採菲葑恩回爽于碧樹不遺簪
履情篤厚于青山

代上蓋稽勳

考蒲

明李國祥

恭惟某官英鑒無遺寒與冰壺共凜勳書鮮枉春從
玉尺俱融彈冠錄刈楚之才奮袂勵濯纓之致山公

明雅曷擬遇事風生阮老清貞難並兢華日丘五人
繼美三掌稱平某榆社朽材花城下吏久叨李地近
頂蘇天奏薄效以三年覲最程而一命慨崔群孤寒
之滯期魏貸細節之圓奚受還職之思寔拜逮親之
賜尚比黃裳白羽期賽德於恩波猶欲鳴孫號韓勵
酬知於省眼

上王驗封啓

考滿

明李國祥

小宰登賢景炳席公之鑑副銓假重聿開樂令之天
慶溢槐階榮分榆社恭惟其官清融水柱峻峙斗杓
奮鵬翻以垂天展驥蹄而逐電口清海岱依依風月
之談頌美銓衡眷眷孤寒之滯庭中有樹澤流自本
前來李下無蹊升榮寧量後至某性天不韻才地無
奇方懷捉刺之遲乃幸考績之便裁緘寫抱表囊中
獨仰嵩高匿垢藏瑕見靈雨專須雲密逾賜逮親之
典曲寬曠職之譽孔翼不自他門頂踵寔非已物

上李選部啓

明朱錦

徽猷夙茂甄收總六合之英材偉望日隆眷注啓九
重之鼎命瞻懷最切戀德惟殷恭惟某官天假絲綸
之重人推華岳之尊殊勲工徹于帝闈譽命復騰于
廷簡特俞師錫爰授銓衡識朗凝玄庶職之妍媸必

啓集類函卷三十一
辨騰虛鑿物群工之黜陟誠宜與士無私舉材應器
允係巖廊倚重豈止寰宇具瞻猶然篤念故知垂情
梓里如其者西江葦帶東海波臣辱交誼之雖深悵
雲泥之久隔茲者濯纒鱗于澗水希心鴻浪微沾奮
短翮于吳山妄意高標餘拂所幸台旌道出三衢可
舒離索柰值萍踪奔馳當道竟爾睽違徒次寸衷謹
緘尺素用際逢陽之運聊攄積縷之私仰冀淵涵俯
垂電察惠存好我無靳德音

上羅選部啓

明張應泰

氷鑑神勞錦畫初榮于賜沐台衡望重金秋驟訝于
登仙東山之蠟屐心違北闕之雞籌響附巨源在事
知未竟于嵇生康伯當銓寧遽忘乎吳隱以此彈冠
之慶繆希戴笠之盟然而引睇清標念登龍而莫卽
訖令垂眉墨綬悲伏驥以增慚深惟賢喆之升大是
朝廷之幸輒陳踊躍以答綢繆伏祈忠葵宸幄班行
早列于黃扉業勒鼎彝富貴直臻乎白髮

上顧選部啓

明沈一中

主爵居列曹之右合三才四實以署銓職秩爲諸卿
之宗駭四司九流其品藻委蛇墨書之暇清雅鶴廳
之餘寰宇杖觀纓弁忭蹈恭惟某官秀接錫山英鍾

帝宸踰恩官人弘新標之選銓曹奮秉皇家廣羅網
之條惟識會既優斯鳳麟之必得而寬大是布亦葑
菲之無遺寰宇拭觀纓弁林蹈恭惟某官紫氣度關
白星協夢藝六絕而書萬軸夙擅士死之翹鄉調元
而里秉鈞特誇閩徼之勝紗籠潛護兆乂徵於異人
廳馬僅旋儉遠繩乎祖武覓佳吏部必良金美玉之
士斯宜求肅朝綱非明鑑平衡之人曷稱是以庇鄰
之司會用轉東曹之典銓洞然城府之皆空舍傍除
棘寂若門庭之如水李下無蹊念其幸處鄉人濫竽
粵選心徒懷於骯髒方柄奚知行每耻於咍憂本腸
可恃緬師嚴範過長樂而拜卓魯之碑仰企台閣望
劇曹而稔李盧之譽竊二天之鴻庇是藉追郵仰兩
曜之餘光莫庾品隙代伸朝野之喜聊貢荒蕪之詞
伏冀洞察冰兢俯垂電矚

上吏部啓

明沈國良

千尋在望夙瞻斗極之光一劄見貽驚拜鼎彝之重
顧凡材思奮罔非借力於扶搖即群品在鎔實乃借
資於陶冶况南國尤爲咫尺而仁風更篤暇依衽具
蟻忱聊充野獻恭惟某官熙明龍輔函省鴻儀彩筆
生花瑞奪廬山之秀清標冠王光凝彭澤之紋魏科

早掇於鸞騰巨邑遂膺於敷歷分符太末來暮興歌
縮墨綬雲間去思騰誦昔花封製錦循良宇內無雙
今衡鑑當樞譽望銓曹第一百僚襖衽以欽承多士
彈冠而相慶驪黃牝牡暫資藻鑑于彤霄密勿樞機
佇荷鹽梅干紫府如某者佞材無當弱植靡支涉世
如鷓之托枝服官若魚之上竹幸蒙二天之庇先施
一顧之榮芳華久捧雲端侈盈尺璧赫蹠遲通字下
為結寸心祇緣奔走馬牛以致濶踈魚雁茲挹歷陽
之勺薄采芹芽遙望天際之霞少紆樸悃蓬心不次
淵量為函

上涇陽顧吏部啓

明成於思

柯亭不聽則枯桐絕響崑溪不琢則石竅無輝漢騎
朝馳出塵之思靡遠齊郊夕唱白石之調彌高世無
孫陽鹽車其伏櫪矣時逢和氏荆璞其連城乎蓋必
假先容乃成後進是以君子不患豫章梗梓之不生
而患大匠氏之不作不患龍淵太和之不利而患博
物者之不逢某也困頓一方連揮四啓不惟無補於
乞憐反得取憎於搖尾是詞翰為行已之外篇文章
為立身之岐路矣恭惟某官情岳干霄締址構瓊峰
之瑞心波湛漢崇基毓珠溜之輝丹府幽玄星渚泛

朝虹之景靈臺宏遠霜潭馳宵練之精學海波清泛
文江之碧浪詞林萼秀陳藝苑之奇葩策冠群芳名
魁列宿宗詞楚傳揜金許以褰裳味道扶陽駕韓揚
而岳立志同者蓮心可採道合者蘭味難忘涉級禮
闈樂奏九天之響職遷選部英標十里之雄秉毛介
之庶明抑壬僉之薄俗樹山濤之雅望伸筦庫之微
民翦邪擊佞表勁氣於長揚植善旌賢著蜚聲於翰
海功超振鷺望肅翔鸞柰何介直難容復下膠西之
命天心獨眷仍歸法紀之司金波離畢葭管之灰自
飛韶光建寅蕭丘之火暫熱所冀顧盼成飾咳唾爲
恩斗水不遺於濡沫之枯鱗餘光暫拂於孀樓之寒
女隨在揚休得與三春並茂有感斯應不與四啓同
歸桑榆幸甚斯文幸甚

上蔡文選啓

明李國祥代

喉舌登賢先任共嗟已盼銓衡典劇後遷同擬將超
瞻丘山岌岌連天映沔水澄澄徹底墨書奸照孤寒
鮮蹙額於無援金鏡寵來雅素多旋冠于有託方省
眼以別藻指席面于顛槐甚曩榮望履謬從一面以
金蘭比辱報章喜自三過而珠玉知止談乎風月禁
亟敘其寒暄寔仰清名非其踈節乃守茲疲郡媿莫

效于一籌而最以上官倖有奏于三歲逢故交司績
或寬細節之圓念下品共官端垂長綆之引譽從獎
借俯容還職之圖感深鏤銘仰拜逮親之賜冒達中
涓端馳下走伏乞不遺簪履情曾篤慕于青山猶願
下採葑菲恩仍回爽于碧樹

通司官

通錢吏部啓

宋呂祖謙

列戟相望夙託門闈之舊擁麾歸覲復承桀獲之餘
接武有期拊躬載抃恭惟某官德隆民表識貫邦經
曠陰陽消長之原極文武弛張之用河山帶礪駢旄
傳百世之盟彝鼎烝嘗膳服襲五王之慶尚矣典刑
之未替蔚然文獻之可觀早涉要津浸敷華問大邦
維屏澤久浹於侯藩太微積星望夙高於郎位越從
間燕申命拊循衡經律以參稽權恩威而並用魯公
報政方當入輔之年楚尹告新其在合符之日某昔

勤展對今幸規隨瞻遐躅以益高策羸軀而自愧受
雄劇浩繁之責竊有懼焉承漸摩綏輯之餘則知免
矣氣和青律日靖黃堂願茲護於節宣用寧承於眷
倚

通司官

通吏部許司務啓

明俞昌明

雲護鶴廳亮天工于玉甸星懸烏位明台曜于珠躔
式副秉銓允宜結綬恭惟某官敬亭挺秀宛水儲英
丹地懷香作諸司之領袖銀臺執簡掌群吏之權衡
品類王裴共羨覺佳粹品才超馬杜堪誇典碎弘才
定榮辱于幕頭奸邪竄落別妍媸于省眼賢哲登庸
暫列劇曹竚膺峻秩其誼叨桑梓好薦椒蘭昔卧青
羶雅幸東吳聯事今淹赤縣寔慚南粵孤蹤彌天有
蒿間顛託隆隆之芘戴星惟一考丐書下下之勞覬

恩華聊賜逮親徼寵靈敢希還職伴箋菲薄用曝芹
葵總伏台原亮存榮藉

通諸銓司啓

考滿

明謝肇淛

庶品陶甄昔重清通之選九流領袖今推赤管之司
望尺五之天遙懷曳履竊升斗之水私慶彈冠雖廩
廩以質成求寬斧鉞猶欣欣而相告莫罄楮毫恭惟
某官胸素于秋日營四海水壺徹鑑衆忘怨於見嫌
玉尺持衡化已行於錯枉搏鵬既運蜩鷲共荷生成
凡馬皆空駑駘亦長聲價伏念某蓬心未改樗質難
離妄意時名自謂鼠腊之可售折腰塵網寧知螳臂

候司官

代候徐天部啓

明王德乾

伏諗含香鷄舌肅紀燕衡叨典名邦實媿公門之桃
李追懷舊德倍深稷社之枌榆恭惟台臺柯嶺仙才
激江瑞品飛鳧三製錦窠沙報撫字之成司馬一蒐
戎虎閭振張皇之畧煩掄俊髦遂陟清華藻鑒人群
未數頽頊謝咲巖廊物色殊兼王簡裴通不時晉寵
勛堦會見需調台鉉某士官承乏麾守量移炙馬帳
于上洋蒙知國士登龍門于太末詎稱專城既隔雲
霄欲緘題而未敢不遐金玉翻存訊以頻勞是用布

此下惊申之不斐乃三衢地衝而瘠何計保釐五屬民競以囂安施銜轡倘肯貽其鞭指庶藉追乎鰥羞

候陳考功啓

明馬朴

恭惟台臺蓋代人龍行空天馬高山蕃泄有潤澤萬物之功太極渾涵無運用四時之跡自顛昂縉紳之日已雍容廟堂之風簡陟銓曹綜叙流品冰壺高朗映卿月以騰輝玉海澄清影神霄而畢照公正遠追乎徐勉清通更邁于裴楷自懸鑑而論官一時朝無倖位既持衡而校士三晉野鮮遺賢此非不器之鴻才曷建無前之偉績九流慶忭四海歡承其陝右豎

報同僚

報吏部四司啓

陞吏部報任期

明董應舉

某樸櫟凡材支離病骨苟從祿仕久絕意於榮途勉守官常顧何心於越錄乃留銓未幾而可績倏遷官以近而益親心獨疑而自失夫積薪不用則枯朽明時斷木先容則青黃大輅非其才之有異亦其遇之所遭某何人斯當此隆選萬流澄鑑曷以仰佐於下風一字拔人將亦上累於知已謹因部役附報任期服于下僚月之終言絮身受事為日不遐百舍重跡以後為恐

其子不察月之然百紫日受事為日不...
風一室其人深亦土累於味日韜因清於樹將封
鴻豐其何入其當火劉嬰萬氣怒濤自以明也
報禮木夫谷限青黃大神非其木之許與亦其
以武而益賦必嚴疑而自夫夫蘇蘇不用限
守官常願向以心妹疑凡留鉢未幾而何
其難辨只林支輻泳骨尚到疑出又說實公
時吏濬四同智 時世世 由董舉
辨同熱

儒畿南下吏愧落簿書之尾瑣難近龍門幸叨夾袋
之甄收獲依燕屢茲者恭聞下執榮祇上仁亟深望
履之懷莫遂掃門之願敢緘束帛聊佈寸局幣以恭
將事其大夫之賢者請無辭却休乎相臣之容焉欣
感之私揆裁曷旣

候吏部郎啓 豫章人

明史鴻修

寵茂丹宸百辟藉甄陶之重光浮画省九天近閭閻
之居斗山繫望於寰區衡鑑推高於廊廟門庭色動
簪笏欽承恭惟老師國棟高標廟絃古調五百年名
世應聖作以開祥三千載真儒協昌期而顯瑞品軼

九苞鳳彩輝騰南浦之雲筆扛百斛龍文潤洒西山
之雨金闈射策名高天祿石渠錦邑烹鮮譽冠中都
單父肆鳴華于粉署愈簡注於宸旒特晉銓闈爰司
藻鑑冰壺朗照輝玉燭于神機水鏡澄花炫金波於
靈府低昂萬品而杞梓梗楠之質悉爲希世奇珍苞
簡群英而驪黃牝牡之材盡入天閑妙選蛟翔豹變
賢豪奔走光塵玉尺金莖清峻止談風月豈惟聲宏
玉陛光六典而品藻人倫卽看垂啓金甌撫五辰而
燮調台鼎其雲林樛植蓼昌已鶴棲昔荷甄收一徵榮
于樞李茲焉忝竊寔增媿於菲葑廓吹萬以爲恩感
在三而莫報風塵鞅掌久絀頂申候於師垣台斗傾心
祇厯瞻懷于下臆遙睇程叩而耿念敬憑湘素以紆
忱伏冀崇嚴俯垂霽照

候下吏部啓

明王世雲

天曹崇秩夙稱銓鏡之司太宰清班雅負廟堂之望
光生簪笏慶洽枌榆恭惟台臺星緯元精山川正氣
北宸射策聲華蚤振於雲霄南甸飛鳧膏澤旁流於
蒼赤惟眷隆於黼辰遂簡擢於銓曹陶金汰礫品定
一代之冠裳絀濁揚清進退百寮之淑慝共欽啓事
訐謨佇覩端揆偉績其在棗梓則爲後進在簿書則

近迂疎得沾化雨之栽培寔戴慈雲之庇覆旌旄暫
駐莫伸咨覲之私笱牘少將聊展芹葵之念伏祈崇
鑒曷任榮欣

候吏部郎王公啓

明戴新

際風雲而參六典日趨龍尾清班精月旦以甄百寮
名列鷄翹仙從懸冰壺之清徹光映天曹依郎署之
崔巍喜叨厦蔭恭惟某官嶙峋玉立峻潔霜飛長安
之佳氣鬱葱獨鍾德鳳帝里之清風駘蕩高騁文龍
燁法星曾照益於關陝輝郎宿近依北斗於京華帝
念銓衡宜資鴻碩乃結綬於漢殿俾懸鑑於鶴廳甄
我繡纓畧春華而採秋實錫時封爵慎紫誥而誌黃
綸遂使率土承風咸生磨鈍策駑之氣佇見自天錫
寵蚤陟佩荷曳履之階其自媿凡資叨依上詰南宮
射策曾分羶榜之清輝東海濫竿更竊銀波之餘潤
貫鑲惟切聞問久疎敢勤一介之將遙致二天之戴
舉頭日近恍疑咫尺龍光極目雲遮何地祇承玉咳
郵筒書去驛道神俱

候冊陽丁吏部啓

明王德乾

書捧紫泥摠六曹而冠寵筆簪赤管班三事以持衡
清華色映乎風橋瞻注神搖于霞洞恭惟某官夢溪

名世練冰真人鳳毛太祖武之光義易高宗工之譽
綰符三邑化覃燕越花封虛席九重功試秋冬蘭署
晉之省眼升以官眉烏位綜材永鑑擅望郎之列霍
廳釐績風稜劇庶品之司頃假沐于金池暫舒吟乎
玉嶼四海懸瞻丰采寂稱啓事之無私中朝急倚持
衡未許憇勞之良久趣車在邇賜鏡非遙念其寡識
無竒多緣有道夙相聞于粉社嚮往方殷偶共事於
棘司交驩頗洽自公曲阿榮返遂稀流水之彈迫余
太末旋麾彌切高山之仰亦分雲霄隔絕寧忘日月
懷思跂想驅歌告虔鯉札所冀矜其誠壹恕此迂踈
傾蓋素盟敢盼睽故人於天上臨軒采問莫吹嗟拙
吏於江干

候嚴陵毛吏部郎啓兄弟同朝與其弟有交

明王德乾

武疆人瑞文毅才名鳳毛振世作之求鴻羽擅齊鳴
之美精微大易士稱瀧水宗工愷悌循聲上擢鍾陵
最諫烏郎星炯妙庶品之銓綜蘭署風清分群倫之
涇渭澄心昭其夷曠峻望奪乎神明公輪憇以舒夙
勞暫辭啓事帝虛席而隆特眷急倚持衡某也索米
長安濫竽柯郡親承叔度幸御李于雲間私淑元方

未識荆於瀨上雖則雲泥之分隔敢附一夔不勝斗山之仰殷告虔雙鯉所祈赤管垂鑒素書僎推綠池草之交寧忍擯野芹之獻匡時無畧惟鞭策之勤施致主有懷願栽培而不靳

候謝選君啓

明林世吉

飛聲直諒特章金背之稱登譽清平先獲紫泥之捧銓東西以對掌衙南北以甄收國倚持衡士分懸鏡恭惟其官儒林偉望昭代名賢玉海遙澄影層空而畢照冰壺高朗映卿月以騰輝時有盛名不堪崔談之選才非信器難當盧毓之掄資品藻于山濤形墀

啓事簡經綸于傳說此系府調羨百辟欽承九沅慶忤其三山末學五柳閑身在澗地寬已遂考槃之叶甘棠蔭遠長歌勿翦之詩懷德難忘狃枕上候茲因鴻便敬肅魚箋遙切巖瞻統祈電燭

候洪經寰南吏曹啓

明吳明郊

位冠留曹坐輔萬年之曆署稱天部居當百辟之尊箋簡通名涓埃布悃恭惟其官洪厓仙胤白嶽神標道脉接程朱獨得聖賢之心法科名聯伯仲並揚鍾鼎之家聲奮庸而職宅司空曾見鴻儀展彩典禮而勛崇宗伯遂蒙螭陛加恩更以裴楷之芳標特賁山

公之峻秩精忠夙著表官常而明察玉衡清鑒時稱
膺帝寵而榮褒金鏡允賴仔肩之重任商鼎需調行
膺汝翼之嘉謨虞廷宅揆某誼重通家情深仰斗社
結粉榆謬取他山而攻玉陰聯桑梓叨從後榜以登
金一自束帶于海邊頓覺形神兩俗未得披雲于都
下又慚鱗翼俱踈翻恨天塹之遙敬托秋毫之末恭
呈濡削遐心飛遶三山仰候興居履口駢臻萬福得
蒙麾頓奚任勤渠

候吏部范王事啓

明許以忠

建典統官聖世重四銓之法持衡秉鑑賢聲慰萬國
之瞻仕藉肅清人情交暢恭惟某官虞廷瑞鳥淮海
神龍瀟洒靈襟玩景仁之風月清修嫵節甘文正之
糞鹽勛已著于銜屏秩乃躋於文部標格挺玉山而
聳峻表率官儀化裁懸金鏡以精明主持公道拔茅
連茹弘開衆正之門插棘編籬永塞群邪之路業已
並勲於裴馬行當接武於夔龍

候林銓部啓

明連繼芳

恭惟某官著蔡金閨鹽梅玉鼎備四時之元氣仕路
彈冠攬一代之銓衡倖門絕履九天春雨爭妍桃李
無偏萬籟秋風借翼鸞鳩有地凡在旻蒙之下均遊

塊北之中如某者登龍於受書之年附驥在射策之日方幸貴人之升天上何憂故人之落泥中僵胡然而起蟄應南山之雷涸何由而蘇鱗得西江之水蓋鳥知木擇肯捨控地之榆枋而燕賀屢成更傍誰家之門戶僭呈素牘引領清塵

候董見龍考功啓

明施德政

持衡峻秩夙稱銓鏡之司振鷺清班雅重珪璋之選式是百辟望侈兩都恭惟某官正學純忠徽猷亮節鳳騫閩海應聖作以開祥龍躍天衢協昌期而間出文章自堪範俗巍然國子先生錢穀獨裕經邦允爲司徒薦更宸旒特注銓宰疏榮收一時之棖楠棟梁六治羽儀丕著辨庶官之忠邪枉直九重甄別攸資海上驚心鼓壯夫咸思敢決殿前奏疏憑天子以作威靈蓋端本樹則之勳實以人事君之義者也某理戎忝竊負乘多慚提劍戟以驅馳徒切高山之仰儼羹墻於夙夜何論萬戶之封側目雲霄垂情斗極肅題魚素仰藉龍光臨楫不盡欲言徼惠統祈委鑒

候董勳部啓

明金璋

日月有明容光必照樓臺之得近水者先叨蠅託于廿年際鳳翔于千仞凡庇其宇下莫不因依胡爲乎

泥中而敢自外恭惟其官前身三策註脚六經水徹
底澄澄先造士於壁水山連天岌岌隨照人以玉山
擅裴馬之能名拔宋蘇于殊等披籬撤棘自塞蹊徑
之門擁月談風誰來屏膺之謔古以判曹之鈐制晉
捧紫泥公以故寔之講求擢居左闈試觀潢池之難
靖孰是盟府之未酬子推曷後賞於四蛇昭卯曷稱
功於五乘倘簡稽而旌別疇感忿以淵沈某寔不才
竊憐薄豎以長纓而博長裾當道咸寃起九地而升
九天等功是賴希垂省眼願附點頭古人有言請自
愧始今日之事寔同韓書爲於可爲惟此時逢時兮
難再得之不得曰有命造命者其誰念窮猿之奔林
豈遑擇木嗟飛鵲之繞樹一借巢枝聊以慰其蹉跎
敢自有其頂踵媿無銜珠之報徒祝錫鏡之榮

心旌其不任翹企欣幸之至

請司官宴

請徐觀我天部啓

明王德乾

明允銓綜賜鏡表燕鴻之鑒
 清華欵洽飛觴聆風月
 之談三署難酬一醅擬進
 恭惟台臺巖廊人瑞洞府
 仙才獨擅羲宗發潔淨精
 微之秘三飛鳧鳥兼恩威
 愛訓之長迨徵最干霍沙
 先借威干虎闡晉之省眼
 升為帝侯藻人倫則劉鷟
 風稜計吏績則蘓頌冰鑑
 須者握蘭假沐養峻塗以
 如山問葵區居抱澄心而
 似水馬旋猶隘儉先黃閣
 人家燕賀初成醉到青霞
 客寄某自一麾而承乏屈
 九節以蒙招醅酌歸來

長記三公之厚躋躋報塞喜存陶令之尊且咨石畫
于元卿或道素餐于俗吏冒通魚使虔跂烏郎

謝司官

謝從官啓 陞知州

宋呂祖謙代

岸江之壤條教用希被邊之州憂虞寔重曾是迂踈
之質膺茲推擇之餘庀事有初撫躬無所竊以填拊
凋殘之俗輯寧荒遠之區參稽前聞具載成績術文
大布馬遂至於三千羊祜輕裘田爰開於八百克綏
疲瘵於變富強闕然近世之亡稱邈矣風流之不嗣
怯者拘小文而牽制誕者張空簿以浮夸并邑蕭條
版圖湮墜豈特威權之素奪正惟勞來之不先匪求
循吏之能孰還平世之舊如某者秉心椎魯降命竒

窮才能不及於中庸名實未加於上下問羊問馬既
乏於政聲學箕學裘又頹於世業敢期邇列誤玷薦
書巖虎落以扞城任當禦侮佩魚符而臨衆責在長
民合是兩端萃於一已凌兢拜命龜勉効官靖言忝
冒之由實出帡幪之庇恭惟某官留意人物盡忠國
家樂拔茅連茹之多舉無遺善思采葑下體之略恕
不求全凡宣化以承流必集長而去短故斯辱陋亦
玷使令某敢不外飭管屯內齊封部形格勢禁庶成
襟帶之勲仁漸義摩敢望袴襦之詠

謝王司封啓

宋王安石

伏念某孤窮之人少失所恃雖勉心竭力求以合於
古人而固陋顛蒙動輒乖於時變以此而遊於世未
嘗見恕於人而自趨走下風習聞餘教慰藉之禮稱
揚之私忤巖顏而不加犯上之誅拂威指而更以首
公爲是書文報答騎從見臨不以先進略後生不以
上官卑下吏以至其去重煩送將又調其行使不留
滯爰初就職甫爾踰旬乖離雖新感戀殊甚伏惟順
節自壽副人所瞻

謝胡吏部啓

明諸葛昇

萬彙春榮青帝不言功於桃李百川秋至波臣實飲

德於江湖唯大鈞賦物無垠而寒地托躬有王恩酬
難再義切生三恭惟其官泰岱鍾靈滄溟濯潤道脉
接魯鄒之正功名陋管晏之卑造化筆端玉石罔淆
於三棘星辰掌握龍蛇立判於司銓六鰲背上擎山
挺身任重萬馬羣中駐足定力鎮浮稱先生知為胡
公可不問其弟子論賢者必曰君實將如何此蒼生
譽重且評揆留皇鑒其學徒信已仕欲及親按劔中
原笑指舌而猶在舊竿半世命厭頭其奈何自分躍
冶之金永棄捐於歐鑄誰期伏轅之驥亦鳴噴於樂
郊顧竊祿有年莫禪牛羊之牧寸衷靡置有懷犬馬
之私敬掃空踈贊揚高厚伏祈炤亮可勝瞻馳

謝吳選司啓

陞官

明荊州俊

切惟其猥以庸沅濫叨其職株守官常殊未效乎尺
寸因循歲月徒有媿于心顏負譴懷憂自信難逃清
鑑得容尸位乃知受冶洪爐復昇舊官已云厚幸再
承新命實出非常茲蓋恭遇閣下望隆嵩峻度擴海
涵訶斥弗加已荷包荒之量吹噓迭賜益隆薦拔之
恩口角陽春筆端造化以故若其葑菲之質與叨陞
擢之榮觀海思瀾恩有同於覆載鏤衷刻骨感實重
于丘山徒銘寸丹莫伸涓報顧孤裘短腋恐貽羔袖

之譏駑質下乘終抱僨轅之懼敢不恪守官箴益求
民瘼濡足摩頂少裨圖報之私謹始慮終不負陶鑄
之德肅修寸楮少效微忱伏祈淵涵曷勝榮寵

回咨司官

回表六休吏部啓

明董應舉

流聞義問蓋有歲年枕席異書將如晤合忽承推轂
與躡芳塵昔驥明見賞猶費單詞子尼入曹終符一
字徐寧拔身於海岱蘇頲擇選於中書皆由素望適
愜輿情未有介紹不通行能無數支離病骨翻成爨
後之音擁腫散材偏作輪囷之器內慙玷缺上累知
尤得之若驚將何以報役至水鄉捧緘就道重趼百
舍蓋望紫氣而來著書五千未及青牛之御祇餘耿
耿托之雙魚蹤隔迢迢願分一塵伏惟崇鑒不任主

臣

答吏部啓

明董應舉

江上狎濤共同漁父雲中促駕忽見徵書似芻狗之
再陳豈朽株而可器仰慙推轂但有飲冰恭惟某官
社稷爲心賢豪歸命人惟求舊或以就熟之能道不
遺遐蓋亦中行之尚何圖濩落亦在包荒某一竿滄
海竊慕雲卿千竹烏山堪逃文定每揣心而自分漸
與世而相忘偶以序遷得充郎選山公時聞啓事并
介無收王信復入銓曹夢想不到非開誠布公之獨
切能容流汲綆而及茲敬識五中行趨百舍肅函先

謝請事有期

答沈淮槎吏部啓

明董應舉

殮服芳馨餘二十載後先步武若共一堂蓋臭味之
潛投豈墳麓之待奏彈冠相慶昔但得之素交推轂
何心今乃舉以及我眷焉獨誼且有裨言意芻狗何
以再陳抑朽株時乎見器原夫端居深念悲龍戰之
玄黃所以拔茹疇離恐鳳歌之底滯寧損知人之哲
過爲同氣之求恭惟某官社稷爲身賢豪委命獨手
提文章之柄孤根砥狂瀆之瀾寒裡生姿繡谷之穠
華盡失空中布照山鬼之伎倆皆窮憂世之念甚殷

求舊之心轉切如某不才何堪與立國於蝸之角上
幾爲咲於戴晉之人游於羿之彀中乃自托於申屠
之足但一簑一笠安能獨外於乾坤况此日此時肯
以自棄於君子敢不下漁磯而問道賫蝶夢以出山
世可以爲當亦從長者之後道如可止行復觀滄海
之塵謹問興居仰祈鑒照



